

摩

訶

止

觀

摩訶止觀卷第二上

天台智者大師說

○二勸進四種三昧入菩薩位說是止觀者夫欲登妙位非行不階善解鑽搖醍醐可獲法華云又見佛子修種種行以求佛道行法衆多略言其四一常坐二常行三半行半坐四非行非坐通稱三昧者調直定也大論云善心一處住不動是名三昧法界是一處正觀能住不動四行爲緣觀心藉緣調直故稱三昧也一常坐者出文殊說文殊問兩般若名爲一行三昧今初明方法次明勸修方法者身論開遮口論說默意論止觀身開常坐遮行住臥或可處衆獨則

彌善居一靜室或空閑地離諸喧鬧安一繩牀傍無餘座九十日爲一期結跏正坐項脊端直不動不搖不萎不倚以坐自誓肋不拄牀況復屍臥遊戲住立除經行食便利隨一佛方面端坐正向時刻相續無須臾廢所開者專坐所遮者勿犯不欺佛不負心不誑衆生口說默者若坐疲極或疾病所困或睡蓋所覆內外障侵奪正念心不能遣卻當專稱一佛名字慙愧懺悔以命自歸與稱十方佛名功德正等所以者何如人憂喜鬱怫舉聲歌哭悲笑則暢行人亦爾風觸七處成身業聲響出脣成口業二能助意成機感佛俯降如人引重自力不前假傍救助則蒙輕舉

行人亦爾心弱不能排障稱名請護惡緣不能壞若
於法門未了當親近解般若者如聞修學能入一行
三昧面見諸佛上菩薩位誦經誦咒尚喧於靜況世
俗言語耶意止觀者端坐正念蠲除惡覺捨諸亂想
莫雜思惟不取相貌但直繫緣法界一念法界繫緣
是止一念是觀信一切法皆是佛法無前無後無復
際畔無知者無說者若無知無說則非有非無非知
者非不知者離此二邊任無所任如諸佛任安處寂
滅法界聞此深法勿生驚怖此法界亦名菩提亦名
不可思議境界亦名般若亦名不生不滅如是等一
切法與法界無二無別聞無二無別勿生疑惑能如

是觀者是觀如來十號觀如來時不謂如來爲如來
無有如來爲如來亦無如來智能知如來者如來及
如來智無二相無動相不作相不在方不離方非三
世非不三世非二相非不二相非垢相非淨相此觀
如來甚爲希有猶如虛空無有過失增長正念見佛
相好如照水鏡自見其形初見一佛次見十方佛不
用神通往見佛唯任此處見諸佛聞佛說法得如實
義爲一切衆生見如來而不取如來相化一切衆生
向涅槃而不取涅槃相爲一切衆生發大莊嚴而不
見莊嚴相無形無相無見聞知佛不證得是爲希有
何以故佛卽法界若以法界證法界卽是評論無證

無得觀衆生相如諸佛相衆生界量如諸佛界量諸
佛界量不可思議衆生界量亦不可思議衆生界住
如虛空住以不住法以無相法住般若中不見凡法
云何捨不見聖法云何取生死涅槃垢淨亦如是不
捨不取但住實際如此觀衆生真佛法界觀貪欲瞋
癡諸煩惱恒是寂滅行是無動行非生死法非涅槃
法不捨諸見不捨無爲而修佛道非修道非不修道
是名正住煩惱法界也觀業重者無出五逆五逆卽
是菩提菩提五逆無二相無覺者無知者無分別者
逆罪相實相相皆不可思議不可壞本無本性一切
業緣皆住實際不來不去非因非果是爲觀業卽是

法界印法界印四魔所不能壞魔不得便何以故魔
卽法界印法界印云何毀法界印以此意歷一切法
亦應可解上所說者皆是經文勸修者稱實功德獎
於行者法界法是佛真法是菩薩印聞此法不驚不
畏乃從百千萬億佛所久殖德本譬如長者失摩尼
珠後還得之心甚歡喜四衆不聞此法心則苦惱若
聞信解歡喜亦然當知此人卽是見佛已曾從文殊
聞是法身子曰諦了此義是名菩薩摩訶薩彌勒云
是人近佛座佛覺此法故故文殊云聞此法不驚卽
是見佛佛言卽住不退地具六波羅蜜具一切佛法
矣若人欲得一切佛法相好威儀說法音聲十力無

畏者當行此一行三昧勤行不懈則能得入如治摩
尼珠隨磨隨光證不可思議功德菩薩能知速得菩
提比丘比丘尼聞不驚卽隨佛出家信士信女聞不
驚卽真歸依此之稱譽出彼兩經云○二常行三昧
者先方法次勸修方法者身開遮口說嘿意止觀此
法出般舟三昧經翻爲佛立佛立三義一佛威力二
三昧力三行者本功德力能於定中見十方現在佛
在其前立如明眼人清夜觀星見十方佛亦如是多
故名佛立三昧十住婆沙偈云 是三昧住處 少
中多差別 如是種種相 亦應須論議 住處者
或於初禪二三四中間發是勢力能生三昧故名住

處初禪少二禪中三四多或少時任名少或見世界少或見佛少故名少中多亦如是身開常行行此法時避惡知識及癡人親屬鄉里常獨處止不得希望他人有所求索常乞食不受別請嚴飾道場備諸供具香餚甘果盥沐其身左右出入改換衣服唯專行旋九十日爲一期須明師善內外律能開除妨障於所聞三昧處如視世尊不嫌不恚不見短長當割肌肉供養師況復餘耶承事師如僕奉大家若於師生惡求是三昧終難得須外護如母養子須同行如共涉險須要期擔願使我筋骨枯朽學是三昧不得終不休息起大信無能壞者起大精進無能及者所入

智無能逮者常與善師從事終竟三月不得念世間
想欲如彈指頃三月終竟不得臥出如彈指頃終竟
三月行不得休息除坐食左右爲人說經不得希望
衣食婆沙偈云親近善知識精進無懈怠智慧甚堅
牢信力無妄動口說默者九十日身常行無休息九
十日口常唱阿彌陀佛名無休息九十日心常念阿
彌陀佛無休息或唱念俱運或先念後唱或先唱後
念唱念相繼無休息時若唱彌陀卽是唱十方佛功
德等但專以彌陀爲法門主舉要言之步步聲聲念
念唯在阿彌陀佛意論止觀者念西方阿彌陀佛去
此十萬億佛刹在寶地寶池寶樹寶堂衆菩薩中央

坐說經三月常念佛云何念念三十二相從足下千
輻輪相一一逆緣念諸相乃至無見頂亦應從頂相
順緣乃至千輻輪令我亦逮是相又念我當從心得
佛從身得佛佛不用心得不用身得不用心得佛色
不用色得佛心何以故心者佛無心色者佛無色故
不用色心得三菩提佛色已盡乃至識已盡佛所說
盡者癡人不知智者曉了不用身口得佛不用智慧
得佛何以故智慧索不可得自索我了不可得亦無
所見一切法本無所有壞本絕本其如夢見七寶親
屬歡樂覺已追念不知在何處如是念佛又如舍衛
有女名須門聞之心喜夜夢從事覺已念之彼不來

我不往而樂事宛然當如是念佛如人行大澤飢渴
夢得美食覺已腹空自念一切所有法皆如夢當如
是念佛數數念莫得休息用是念當生阿彌陀佛國
是名如相念如人以寶倚琉璃上影現其中亦如比
丘觀骨骨起種種光此無持來者亦無有是骨是意
作耳如鏡中像不外來不中生以鏡淨故自見其形
行人色清淨所有者清淨欲見佛卽見佛見卽問問
卽報聞經大歡喜其自念佛從何所來我亦無所至
我所念卽見心作佛心自見心見佛心是佛心是我
心見佛心不自知心不自見心心有想爲癡心無
想是泥洹是法無可示者皆念所爲設有念亦了無

所有空耳

其偈云

心者不知心有 心不見心

心

起想卽癡無想卽泥洹

諸佛從心得解脫

心者

無垢名清淨五道鮮絜不受色

有解此者成大道

是名佛印無所貪無所著無所求無所想所有盡所

欲盡無所從生無所可滅無所壞敗道要道本是印

二乘不能壞何況魔邪

云

婆沙明新發意菩薩先念

佛色相相體相業相果相用得下勢力次念佛四十

不共法心得中勢力次念實佛得佛上勢力而不著

色法二身

偈云 不貪著色身

法身亦不著

善

知一切法

永寂如虛空

勸修者若人欲得智慧如

大海令無能爲我作師者於此坐不運神通悉見諸

佛悉聞所說悉能受持者常行三昧於諸功德最爲
第一此三昧是諸佛母佛眼佛父無生大悲母一切
諸如來從是二法生碎大千地及草木爲塵一塵爲
一佛刹滿爾世界中寶用布施其福甚多不如聞此
三昧不驚不畏況信受持讀誦爲人說況定心修習
如穀牛乳頃況能成是三昧故無量無量婆沙云劫
火官賊怨毒龍獸衆病侵是人者無有是處此人常
爲天龍八部諸佛皆共護念稱讚皆共欲見共來其
所若聞此三昧如上四番功德皆隨喜三世諸佛菩
薩皆隨喜復勝上四番功德若不修如是法失無量
重寶人天爲之憂悲如艱人把旃檀而不熏如田家

子以摩尼珠博一頭牛

云

○三明半行半坐亦先方

法次勸修方法者身開遮口說默意止觀此出二經
方等云旋百二十帀卻坐思惟法華云其人若行若
立讀誦是經若坐思惟是經我乘六牙白象現其人
前故知俱用半行半坐爲方法也方等至尊不可聊
爾若欲修習神明爲證先求夢王若得見一是許懺
悔於閑靜處莊嚴道場香泥塗地及室內外作圓壇
彩畫懸五色幡燒海岸香然燈敷高座請二十四尊
像多亦無妨設餚饌盡心力須新淨衣鞵屨無新浣
故出入著脫無令參雜七日長齋日三時洗浴初日
供養僧隨意多少別請一明了內外律者爲師受二

十四戒及陀羅尼呪對師說罪要用月八日十五日
常以七日爲一期決不可減若能更進隨意堪住十
人已還不得出此俗人亦許須辦單縫三衣備佛法
式也口說默者預誦陀羅尼呪一篇使利於初日分
異口同音三遍召請三寶十佛方等父母十法王子
召請法在國清百錄中請竟燒香運念三業供養供
養訖禮前所請三寶禮竟以志誠心悲泣雨淚陳悔
罪咎竟起旋百二十匝一旋一呪不遲不疾不高不
下旋呪竟禮十佛方等十法王子如是作已卻坐思
惟思惟訖更起旋呪旋呪竟更卻坐思惟周而復始
終竟七日其法如是從第二時略召請餘悉如常意

止觀者經令思惟思惟摩訶袒持陀羅尼翻爲大祕
要遮惡持善祕要祇是實相中道正空經言吾從真
實中來真實者寂滅相寂滅相者無有所求求者亦
空得者著者實者來者語者問者悉空寂滅涅槃亦
復皆空一切虛空分界亦復皆空其無所求中吾故
求之如是空空真實之法當於何求六波羅蜜中求
其此與大品十八空同大經迦毗羅城空如來空大
涅槃空更無有異以此空慧歷一切事無不成觀方
等者或言廣平今言方者法也般若有四種方法謂
四門入清涼池卽方也所契之理平等大慧卽等也
令求夢王卽二觀前方便也道場卽清淨境界也治

五住糠顯實相米亦是定慧用莊嚴法身也香塗者
卽無上尸羅也五色蓋者觀五陰免子縛起大慈悲
覆法界也圓壇者卽實相不動地也繒旛卽翻法界
上迷生動出之解旛壇不相離卽動出不動出不相
離也香燈卽戒慧也高座者諸法空也一切佛皆栖
此空二十四像者卽是逆順觀十二因緣覺了智也
餚饌者卽是無常苦酢助道觀也新淨衣者卽寂滅
忍也瞋惑重積稱故翻瞋起忍名爲新七日卽七覺
也一日卽一實諦也三洗卽觀一實修三觀蕩三障
淨三智也一師者卽一實諦也二十四戒者逆順十
二因緣發道共戒也呪者囑對也纓絡明十二因緣

有十種卽有一百二十支一呪一支束而言之祇是
三道謂苦業煩惱也今呪此因緣卽是呪於三道而
論懺悔事懺懺苦道業道理懺懺煩惱道文云犯沙
彌戒乃至大比丘戒若不還生無有是處卽懺業道
文也眼耳諸根清淨卽懺苦道文也第七日見十方
佛聞法得不退轉卽懺煩惱道文也三障去卽十二
因緣樹壞亦是五陰舍空思惟實相正破於此故名
諸佛實法懺悔也勸修者諸佛得道皆由此法是佛
父母世間無上大寶若能修行得全分寶但能讀誦
得中分寶花香供養得下分寶佛與文殊說下分寶
所不能盡況中上耶若從地積寶至梵天以奉於佛

不如施持經者一食充軀如經廣說

云

約法華亦明

方法勸修方法者身開遮口說默意止觀身開爲十

一嚴淨道場二淨身三三業供養四請佛五禮佛六

六根懺悔七遶旋八誦經九坐禪十證相別有一卷

名法華三昧是天台師所著流傳於世行者宗之此

則兼於說默不復別論也意止觀者普賢觀云專誦

大乘不入三昧日夜六時懺六根罪安樂行品云於

諸法無所行亦不行不分別二經本爲相成豈可執

文拒競蓋乃爲緣前後互出非碩異也安樂行品護

持讀誦解說深心禮拜等豈非事耶觀經明無相懺

悔我心自空罪福無主慧日能消除豈非理耶南岳

又

師云有相安樂行無相安樂行豈非就事理得如是
名持是行人涉事修六根懺爲互入弄引故名有相
若直觀一切法空爲方便者故言無相妙證之時悉
皆兩捨若得此意於二經無疑今歷文修觀言六牙
白象者是菩薩無漏六神通牙有利用如通之捷疾
象有大力表法身荷負無漏無染稱之爲白頭上三
人一持金剛杵一持金剛輪一持如意珠表三智居
無漏頂云杵擬象能行表慧導行輪轉表出假如意
表中牙上有池表八解是禪體通是定用體用不相
離故牙端有池池中有花花表妙因以神通力淨佛
國土利益衆生卽是因因從通生如花由池發花中

有女女表慈若無無緣慈豈能以神通加促身令小
入此娑婆通由慈運如華擎女女執樂器表四攝也
慈修身口現種種同事利行財法二施引物多端如
五百樂器音聲無量也不喜見身者是普現色身三
昧也隨所宜樂而爲現之未必純作白玉之像語言
陀羅尼者卽是慈薰口說種種法也皆法華三昧之
異名得此意於象身上自在作法門也勸修者普賢
觀曰若七衆犯戒欲一彈指頃除滅百千萬億阿僧
祇劫生死之罪者欲發菩提心不斷煩惱而入涅槃
不離五欲而淨諸根見障外事欲見分身多寶釋迦
佛者欲得法華三昧一切語言陀羅尼入如來室著

如來衣坐如來座於天龍八部衆中說法者欲得文殊藥王諸大菩薩持花香住立空中侍奉者應當修習此法華經讀誦大乘念大乘事令此空慧與心相應念諸菩薩毋無上勝方便從思實相生衆罪如霜露慧日能消除成辦如此諸事無不具足能持此經者則爲得見我亦見於汝亦供養多寶及分身令諸佛歡喜如經廣說誰聞如是法不發菩提心除彼不肖人癡冥無智者耳○四非行非坐三昧者上一向用行坐此旣異上爲成四句故名非行非坐實通行坐及一切事而南岳師呼爲隨自意意起卽修三昧大品稱覺意三昧意之趣向皆覺識明了雖復三名

實是一法今依經釋名覺者照了也意者心數也三昧如前釋行者心數起時反照觀察不見動轉根原終未來處去處故名覺意諸數無量何故對意論覺窮諸法源皆由意造故以意爲言端對境覺知異乎木石名爲心次心籌量名爲意了了別知名爲識如是分別墮心想見倒中豈名爲覺覺者了知心中非有意亦非不有意心中非有識亦非不有識意中非有心亦非不有心意中非有識亦非不有識識中非有意亦非不有意識中非有心亦非不有心意識非性故名故說一性若知名非名則性亦非性故名故不三非性故不一非三故不散非一故

不合不合故不空不散故不有非有故不常非空故
不斷若不見常斷終不見一異若觀意者則攝心識
一切法亦爾若破意無明則壞餘使皆去故諸法雖
多但舉意以明三昧觀則調直故言覺意三昧也隨
自意非行非坐準此可解就此爲四一約諸經二約
諸善三約諸惡四約諸無記諸經行法上三不攝者
卽屬隨自意也且約請觀音示其相於靜處嚴道場
燔蓋香燈請彌陀像觀音勢至二菩薩像安於西方
設楊枝淨水若便利左右以香塗身澡浴清淨著新
淨衣齋日建首當正向西方五體投地禮三寶七佛
釋尊彌陀三陀羅尼二菩薩聖衆禮已胡跪燒香散

華至心運想如常法供養已端身正心結加趺坐繫
念數息十息爲一念十念成就已起燒香爲衆生故
三徧請上三寶請竟三稱三寶名加稱觀世音合十
指掌誦四行偈竟又誦三篇呪或一徧或七徧看時
早晚誦呪竟披陳懺悔自憶所犯發露洗浣已禮上
所請禮已一人登高座若唱若誦此經文餘人諦聽
午前初夜其方法如此餘時如常儀若嫌闕略可尋
經補益云經云眼與色相應云何攝住乃至意與攀
緣相應云何攝住者大集云如心住如卽空也此文
一一皆入如實之際卽是如空之異名耳地無堅者
若謂地是有有卽實實是堅義若謂地是無是亦有

亦無非有非無是事實皆是堅義今明畢竟不可得
亡其堅性也水性不住者謂水爲有有卽是住乃至
謂水是非有非無亦卽是住今不住有四句亦不住
無四句中亦不住不可說中故言水性不住風性無
礙者觀風爲有有卽是礙乃至謂風非有非無亦無
無四句故言風性無礙火大不實者火不從自生乃
至不從無因生本無自性賴緣而有故言不實觀色
旣爾受想行識一一皆入如實之際觀陰旣爾十二
因緣如谷響如芭蕉堅露電等一時運念令空觀成
勤須修習使得相應觀慧之本不可闕也銷伏毒害
陀羅尼能破報障毗舍離人平復如本破惡業陀羅

尼能破業障破梵行人蕩除糞穢令得清淨六字章
句陀羅尼能破煩惱障淨於三毒根成佛道無疑六
字卽是六觀世音能破六道三障所謂大悲觀世音
破地獄道三障此道苦重宜用大悲大慈觀世音破
餓鬼道三障此道飢渴宜用大慈師子無畏觀世音
破畜生道三障獸王威猛宜用無畏也大光普照觀
世音破阿修羅道三障其道猜忌嫉疑偏宜用普照
也天人丈夫觀世音破人道三障人道有事理事伏
憍慢稱天人理則見佛性故稱丈夫大梵深遠觀世
音破天道三障梵是天主標主得臣也廣六觀世音
卽是二十五三昧大悲卽是無垢三昧大慈卽是心

樂三昧師子卽是不退三昧大光卽是歡喜三昧丈夫卽是如幻等四三昧大梵卽是不動等十七三昧自思之可見云此經通三乘人懺悔若自調自度殺諸結賊成阿羅漢若福厚根利觀無明行等成緣覺道若起大悲身如琉璃毛孔見佛得首楞嚴住不退轉諸大乘經有此流類或七佛八菩薩懺或虛空藏八百日塗廁如此等皆是隨自意攝云○二歷諸善卽爲二先分別四運次歷衆善初明四運者夫心識無形不可見約四相分別謂未念欲念念已未念名心未起欲念名心欲起念名正緣境住念已名緣境謝若能了達此四卽入一相無相問未念未起已

念已謝此二皆無心無心則無相云何可觀答未念
雖未起非畢竟無如人未作作後便作作不可以未
作作故便言無人若定無人後誰作作以有未作作
人則將有作作心亦如是因未念故得有欲念若無
未念何得有欲念是故未念雖未有不得畢竟無念
也念已雖滅亦可觀察如人作竟不得言無若定無
人前誰作作念已心滅亦復如是不得言永滅若永
滅者則是斷見無因無果是故念已雖滅亦可得觀
問過去已去未來未至現在不住若離三世則無別
心觀何等心答汝問非也若過去永滅畢竟不可知
未來未起不可知現在無住不可知云何諸聖人知

三世心鬼神尚知自他三世云何佛法行人起斷滅
龜毛兕角見當知三世心雖無定實亦可得知故偈
云諸佛之所說雖空亦不斷相續亦不常罪福亦不
失若起斷滅如盲對色於佛法中無正觀眼空無所
獲行者既知心有四相隨心所起善惡諸念以無住
著智反照觀察也次歷善事善事衆多且約六度若
有諸塵須捨六受若無財物須運六作捨運共論有
十二事初論眼受色時未見欲見見見已四運心皆
不可見亦不得見又反觀覺色之心不從外來外
來於我無預不從內出內出不待因緣既無內外亦
無中間不常自有當知覺色者畢竟空寂所觀色與

空等能觀色者與盲等乃至意緣法未緣欲緣緣緣
已四心皆不可得反觀覺法之心不外來不內出無
法塵無法者悉與空等是爲覺六受觀云眼根色塵
空明各各無見亦無分別因緣和合生眼識眼識因
緣生意識意識生時卽能分別依意識則有眼識眼
識能見見已生貪貪染於色毀所受戒此是地獄四
運意實愛色覆諱言不此鬼道四運於色生著而計
我我所畜生四運我色他色我勝他劣阿修羅四運
他惠我色不與不取於此色上起仁讓貞信明等五
戒十善人天四運觀四運心心相生滅心心不住心
心三受心心不自在心心屬因緣二乘四運觀已四

運過患如此觀他四運亦復如是卽起慈悲而行六度所以者何六受之塵性相如此無量劫來頑愚保著而不能捨捨不能亡今觀塵非塵於塵無受觀根非根於已無著觀人叵得亦無受者三事皆空名檀波羅蜜金剛般若云若住色聲香味觸法布施是名住相布施如人入闇則無所見不住聲味布施是無相施如人有目日光明照見種種色直言不見相略猶難解今不見色有相無相亦有無相非有無相若處處著相引之今得出不起六十二見乃名無相檀到於彼岸一切法趣檀成摩訶衍是菩薩四運又觀四運與虛空等卽常不受四運卽樂不爲四運起業

卽我四運不能染卽淨是佛法四運如是四運雖空
空中具見種種四運乃至徧見恒沙佛法成摩訶衍
是爲假名四運若空不應具十法界法界從因緣生
體復非有非有故空非空故有不得空有雙照空有
三諦宛然備佛知見於四運心具足明了觀聲香味
觸法五受四運心圓覺三諦不可思議亦復如是準
前可知不復煩記

摩訶止觀卷第二上

摩訶止觀卷第二下

天台智者大師說

次觀六作行檀者觀未念行欲行行已四運遲速皆不可得亦不見不可得反觀覺心不外來不內出不中間不常自有無行無行者畢竟空寂而由心運役故有去來或爲毀戒或爲誑他或爲眷屬或爲勝彼或爲義讓或爲善禪或爲涅槃或爲慈悲捨六塵運六作方便去來舉足下足皆如幻化惛惛虛忽亡能亡所千里之路不謂爲遙數步之地不謂爲近凡有所作不唐其功不望其報如此住檀攝成一切恒沙佛法具摩訶衍能到彼岸又觀一運心十法具足

一不定一故得爲十十不定十故得爲一非一非十
雙照一十一念心中具足三諦住坐臥語默作作亦
復如是準前可知故法華云又見佛子名衣上服以
用布施以求佛道卽此義也前約十二事共論檀今
約一一事各各論六行者行時以大悲眼觀衆生不
得衆生相衆生於菩薩得無怖畏是爲行中檀於衆
生無所傷損不得罪福相是名尸行時心想不起亦
無動搖無有住處陰入界等亦悉不動是名忍行時
不得舉足下足心無前思後覺一切法中無生住滅
是名精進不得身心生死涅槃一切法中無受念著
不味不亂是名禪行時頭等六分如雲如影夢幻響

化無生滅斷常陰界入空寂無縛無脫是名般若具
如首楞嚴中廣說又行中寂然有定相若不察之於
定生染貪著禪味今觀定心心尚無心定在何處當
知此定從顛倒生如是觀時不見於空及與不空卽
破定相不生貪著以方便生是菩薩解行者未悟或
計我能觀心謂是妙慧著慧自高是名智障同彼外
道不得解脫卽反照能觀之心不見住處亦無起滅
畢竟無有觀者及非觀者觀者旣無誰觀諸法不得
觀心者卽離觀想大論云念想觀已除戲論心皆滅
無量衆罪除清淨心常一如是尊妙人則能見般若
大集云觀於心心卽此意也如是行中具三三昧初

觀破一切種種有相不見內外卽空三昧次觀能壞
空相名無相三昧後觀不見作者卽無作三昧又破
三倒三毒越三有流伏四魔怨成波羅蜜攝受法界
增長具足一切法門豈止六度三三昧而已矣若於
行中具足一切法者餘十一事亦復如是次更歷六
塵中兢持謹絜如擎油鉢一滴不傾又於六作中威
儀肅肅進退有序但名持戒持戒果報升出受樂非
是三昧不名波羅蜜若得觀慧於十二事尸羅自成
謂觀未見色欲見見見已四運心種種推求不得所
起之心亦不得能觀之心不內外無去來寂無生滅
其能如是觀身口七支淨若虛空是持不缺不破不

穿三種律儀戒破四運諸惡覺觀卽持不雜戒也不
爲四運所亂卽持定共戒也四運心不起卽持道共
戒也分別種種四運無滯卽持無著戒也分別四運
不謬卽持智所讚戒也知四運攝一切法卽持大乘
自在戒也識四運四德卽持究竟戒也其心旣明淨雙
遮二邊正入中道雙照二諦不思議佛之境界具足
無減其色者色法受者不可得三事皆亡卽檀於色
色者安心不動名忍色色者無染無間名毗梨耶不
爲色色者所亂名禪色色者如幻如化名般若色色
者如虛空名空三昧不得此空名無相三昧無能無
所名無作三昧何但三諦六度王空一切恒沙佛法

皆皆可解觀色塵既爾餘五塵亦然六受六作亦如是法華云又見佛子威儀具足以求佛道卽此義也次歷忍善者還約作受皆有違順順是可意違不可意於違不瞋於順不愛無見無見者無作無作者皆如上說次歷精進善蕉云精進無別體但篤衆行義而推之應有別體例無明通入衆使更別有無明今且寄誦經勤策其心以擬精進晝夜不虧乃得滑利而非三昧慧今觀氣息觸七處和合出聲如響不內不外無能誦所謂悉以四運推檢於塵不起受者於緣不生作者煩惱不間誦說念念流入大涅槃海是名精進云次歷諸禪根本九想背捨等但是禪非波

羅蜜觀入定四運尚不見心何處有定卽達禪實相
以禪攝一切法故論第五解八想竟明十力四無所
畏一切法諸論師不達玄旨咸謂論誤未應說此此
是論主明八想作摩訶衍相故廣釋諸法耳云次歷
智慧者釋論八種解般若今且約世智用觀六受六
作四運推世智匠得皆如上說約餘一切善法亦如
是問若一法攝一切法者但用觀卽足何須用止一
度卽足何用五度耶荅六度宛轉相成如被甲入陣
不可不密云觀如燈止如密室浣衣刈草等云又般
若爲法界徧攝一切亦不須餘法餘法爲法界亦攝
一切亦不須般若又般若卽諸法諸法卽般若無二

無別

云

○三以隨自意歷諸惡事者夫善惡無定如

諸蔽爲惡事度爲善人天報盡還墮三塗已復是惡
何以故蔽度俱非動出體皆是惡二乘出苦名之爲
善二乘雖善但能自度非善人相大論云寧起惡癩
野干心不生聲聞辟支佛意當知生死涅槃俱復是
惡六度菩薩慈悲兼濟此乃稱善雖能兼濟如毒器
貯食食則殺人已復是惡三乘同斷此乃稱好而不
見別理還屬二邊無明未吐已復是惡別教爲善雖
見別理猶帶方便不能稱理大經云自此之前我等
皆名邪見人也邪豈非惡唯圓法名爲善善順實相
名爲道背實相名非道若達諸惡非惡皆是實相卽

行於非道通達佛道若於佛道生著不消甘露道成
非道如此論善惡其義則通今就別明善惡事度是
善諸蔽爲惡善法用觀已如上說就惡明觀今當說
前雖觀善其蔽不息煩惱浩然無時不起若觀於他
惡亦無量故修一切世間不可樂想時則不見好人
無好國土純諸蔽惡而自纏裹縱不全有蔽而偏起
不善或多慳貪或多犯戒多瞋多怠多嗜酒味根性
易奪必有過患其誰無失出家離世行猶不備白衣
受欲非行道入惡是其分羅漢殘習何況凡夫凡夫
若縱惡蔽摧折俯墜永無出期當於惡中而修觀慧
如佛世時在家之人帶妻挾子官方俗務皆能得道

央掘摩羅彌殺彌慈祇陀末利唯酒唯戒和須蜜多
嬌而梵行提婆達多邪見卽正若諸惡中一向是惡
不得修道者如此諸人永作凡夫以惡中有道故雖
行衆蔽而得成聖故知惡不妨道又道不妨惡須陀
洹人姪欲轉盛畢陵尚慢身子生瞋於其無漏有何
損益譬如虛空中明暗不相除顯出佛菩提卽此意
也若人性多貪欲穢濁熾盛雖對治折伏彌更增劇
但恣趣向何以故蔽若不起不得修觀譬如綸釣魚
強繩弱不可爭牽但令鈎餌入口隨其遠近任縱沈
浮不久收獲於蔽修觀亦復如是蔽卽惡魚觀卽鈎
餌若無魚者鈎餌無用但使有魚多大唯佳皆以鈎

餌隨之不捨此蔽不久堪任乘御云何爲觀若貪欲起諦觀貪欲有四種相未貪欲欲貪欲正貪欲貪欲已爲當未貪欲滅欲貪欲生爲當未貪欲不滅欲貪欲生亦滅亦不滅欲貪欲生非滅非不滅欲貪欲生若未滅欲生爲卽爲離卽滅而生生滅相違若離而生生則無因未貪不滅而欲生者爲卽爲離若卽卽二生相並生則無窮若離生亦無因若亦滅亦不滅而欲生者若從滅生不須亦不滅若從不滅生不須亦滅不定之因那生定果若其體一其性相違若其體異本不相關若非滅非不滅而欲貪生雙非之處爲有爲無若雙非是有何謂雙非若雙非是無無那

能生如是四句不見欲貪欲生還轉四句不見未貪
欲滅欲貪欲生不生亦生亦不生非生非不生亦如
上說觀貪欲蔽畢竟空寂雙照分明皆如上說是名
鉤餌若蔽恒起此觀恒照亦不見起亦不見照而起
而照其又觀此蔽因何塵起色耶餘耶因何作起行
耶餘耶若因於色爲未見欲見見見已若因於行未
行欲行行行已爲何事起爲毀戒耶爲眷屬耶爲虛
誑耶爲嫉妬耶爲仁讓耶爲善禪耶爲涅槃耶爲四
德耶爲六度爲三三昧耶爲恒沙佛法耶其如是觀
時於塵無受者於緣無作者而於塵受根緣雙照分
明幻化與空及以法性不相妨礙所以者何若蔽礙

法性法性應破壞若法性礙蔽蔽應不得起當知蔽
卽法性蔽起卽法性起蔽息卽法性息無行經云貪
欲卽是道患癡亦如是如是三法中具一切佛法若
人離貪欲而更求菩提譬如天與地貪欲卽菩提淨
名云行於非道通達佛道一切衆生卽菩提相不可
復得卽涅槃相不可復滅爲增上慢說離姪怒癡名
爲解脫無增上慢者說姪怒癡性卽是解脫一切塵
勞是如來種山海色味無二無別卽觀諸惡不可思
議理也其常修觀慧與蔽理相應譬如形影是名觀
行位能於一切惡法世間產業皆與實觀不相違背
是相似位進入銅輪破蔽根本本謂無明本傾枝折

顯出佛性是分證真實位乃至諸佛盡蔽源底名究竟位於貪蔽中豎具六卽橫具諸度一切法例如上云次觀瞋蔽若人多瞋鬱鬱勃勃相續恒起斷不得斷伏亦不伏當恣任其起照以止觀觀四種和瞋從何生若不得其生亦不得其滅歷十二事瞋從誰生誰是瞋者所瞋者誰如是觀時不得瞋來去足迹相貌空寂觀瞋十法界觀瞋四德如上說云是爲於瞋非道通達佛道觀犯戒懈亂邪癡等蔽及餘一切惡事亦如是○四觀非善非惡卽是無記夢瞢之法所以須觀此者有人根性性不作善復不作惡則無隨自意出世因緣奈此人何大論云無記中有般若波

密者卽得修觀也觀此無記與善惡異耶同耶同
則非無記異者爲記滅無記生記不滅無記生記亦
滅亦不滅無記生記非滅非不滅無記生求記不可
得何況無記與記同異耶非同故不合非異故不散
非合故不生非散故不滅又歷十二事中爲何處生
無記爲誰故生無記誰是無記者如此觀時同虛空
相又無記一法生十法界及一切法又無記卽法性
法性常寂卽止義寂而常照卽觀義於無記非道通
達佛道無記爲法界橫攝諸法豎攝六位高廣具足
例如上說復次但約最後善明隨自意此是次第意
若善惡俱明隨自意卽是頓意若約攝牒之善明隨

自意此則不定意云○復次四種三昧方法各異理
觀則同但三行方法多發助道法門又動障道隨自
意既少方法少發此事若但解方法所發助道事相
不能通達若解理觀事無不通又不得理觀意事相
助道亦不成得理觀意事相三昧任運自成若事相
行道入道場得用心出則不能隨自意則無間也方
法局三理觀通四云問上三三昧皆有勸修此何獨
無答六蔽非道卽解脫道鈍根障重者聞已沈沒若
更勸修失旨逾甚淮河之北有行大乘空人無禁捉
蛇者今當說之其先師於善法作觀經久不徹放心
向惡法作觀獲少定心薄生空解不識根緣不達佛

意純將此法一向教他教他既久或逢一兩得益者如蟲食木偶得成字便以爲證謂是事實餘爲妄語笑持戒修善者謂言非道純教諸人徧造衆惡盲無眼者不別是非神根又鈍煩惱復重聞其所說順其欲情皆信伏隨從放捨禁戒無非不造罪積山岳遂令百姓忽之如草國王大臣因滅佛法毒氣深入于今未改史記云周末有被髮袒身不依禮度者遂犬戎侵國不絕如紂周姬漸盡又阮籍逸才蓬頭散帶後公卿子孫皆數之奴狗相辱者方達自然擗節兢持者呼爲田舍是爲司馬氏滅相宇文邕毀廢亦由元嵩魔業此乃佛法滅之妖怪亦是時代妖怪何關

隨自意意何以故如此愚人心無慧解信其本師又慕前達決謂是道又順情爲易恣心取樂而不改迷僻如西施本有心病多喜嘖呻百媚皆轉更益美麗鄰女本醜而敷其嘖呻可憎彌劇貧者遠徙富者杜門穴者深潛飛者高逝彼諸人等亦復似是狂狗逐雷造地獄業悲哉可傷旣嗜欲樂不能自止猶如倉蠅爲唾所黏浪行之過其事略爾其師過者不達根性不解佛意佛說貪欲卽是道者佛見機宜知一種衆生底下薄福決不能於善中修道若任其罪流轉無已令於貪欲修習止觀極不得止故作此說譬如父母見子得病不宜餘藥須黃龍湯鑿齒瀉之服已

病愈佛亦如是說當其機快馬見鞭影卽到正路貪
欲卽是道佛意如此若有衆生不宜於惡修止觀者
佛說諸善名之爲道佛具二說汝今云何呵善就惡
若其然者汝則勝佛公於佛前灼然違反復次時節
難起王事所拘不得修善令於惡中而習止觀汝今
無難無拘何意純用乳藥毒他慧命故阿舍中放牛
人善知好濟令牛群安隱若好濟有難急不獲已當
從惡濟惡濟多難百不全一汝今無事幸於好濟善
道驅牛何爲惡道自他沈沒破壞佛法損失威光誤
累衆生大惡知識不得佛意其過如是復次夷險兩
路皆有能通爲難從險善惡俱通審機入蔽汝棄善

專惡能通達非道何不蹈躡水火穿逾山壁世間險
路尚不能通何況行惡而會正道豈可得乎又不能
知根緣直是一人卽時樂善卽時樂惡好樂不定何
況無量人邪而純以貪欲化他淨名云我念聲聞不
觀人根不應說法二乘不觀尚自差機況汝盲瞶無
目師心者乎自是違經不當機理何其愚惑頓至於
此若見有人不識機宜行說此者則戒海死屍宜依
律擯治無令毒樹生長者宅云復次檢其惡行事卽
偏邪汝謂貪欲卽是道陵一切女而不能嗔恚卽是
道害一切男唯愛細滑觸是道畏於打拍若涇觸則
無有道行一不行一一有道一無道癡闇如漆偏行

汙損譬如死屍穢好花園云難其偏行如前或將水火刀杖向之其卽默然或荅云而汝不見我常能入此乃違心無慙愧語亦不得六卽之意所以須說此者上三行法勤策事難宜須勸修隨自意和光入惡一往則易宜須誠忌如服大黃湯應備白飲而補止之云問中道正觀以一其心行用卽足何須紛紜四種三昧歷諸善惡經十二事水濁珠昏風多浪鼓何益於澄靜耶荅譬如貧窮人得少便爲足更不願好者若一種觀心心若種種當奈之何此則自行爲失若用化他他之根性舛互不同一人煩惱已自無量何況多人譬如藥師集一切藥擬一切病一種病人

須一種藥治一種病而怪藥師多藥汝問似是煩惱
心病無量無邊如爲一人衆多亦然云何一人若人
欲聞四種三昧聞之歡喜須徧爲說是爲世界以聞
四種次第修行能生善法卽具說四是各各爲人或
宜常坐中治其諸惡乃至隨自意中治其諸惡是名
對治是人具須四法豁然得悟是第一義祇爲一人
尚須四說云何不用耶若爲多人者一人樂常坐三
非所欲一人欲常行三非所樂徧赴衆人之欲卽世
界悉檀也餘三悉檀亦如是又約一種三昧亦具四
悉檀意若樂行卽行樂坐卽坐行時若善根開發入
諸法門是時應行若坐時心地清涼喜悅安快是時

應坐若坐時沈昏則抖擻應行行時散動疲困是則
應坐若行時恍焉虛寂是則應行若坐時湛然明利
是時應坐餘三例爾云問善扶理可修止觀惡乖理
云何修止觀荅大論明根遮有四一根利無遮二根
利有遮三根鈍無遮四根鈍有遮初句上品佛世之
時身子等是其人也行人於善法中修止觀者以勤
修善法未來無遮常習止觀令其根利若過去具此
二義今生薄修卽得相應從觀行位入相似真實今
生不得入者昔無二義今約善修令未來疾入次句
得道根利而罪積障重佛世之時闍王央掘示其人
也逆罪遮重應入地獄見佛聞法豁爾成聖以根利

故遮不能障今時行人於惡法中修止觀者卽此意也
也起惡故未來有遮修止觀故後世根利若遇知識
鞭入正道云何而言惡法乖理不肯修止觀耶次
根鈍無遮者佛世之時周利槃特示是其人雖三業
無過根性極鈍九十日誦鳩摩羅偈智者身口意不
造於諸惡繫念常現前不樂著諸欲亦不受世間無
益之苦行今時雖持戒行善不學止觀未來無遮而
悟道甚難後句者卽一切行惡之人又不修止觀者
是也不修止觀故不得道根鈍千徧爲說兀然不解
多造罪惡遮障萬端如願人身痺針刺徹骨不知不
覺但以諸惡而自纏裹以是義故善雖快理道田止

觀惡雖乖理根利破遮唯道是尊豈可爲惡而廢止
觀大經云於戒緩者不名爲緩於乘緩者乃名爲緩
應具明緩急四句合上根遮義也云又經云寧作提
婆達多不作鬱頭藍弗卽其義也應勤聽思修初無
休息如醉婆羅門剃頭戲女披袈裟云○第三爲明
菩薩清淨大果報故說是止觀者若行違中道卽有
二邊果報若行順中道卽有勝妙果報設未出分段
所獲花報亦異七種方便況真果報邪香城七重橋
津如畫卽其相也此義在後第八重中當廣分別問
次第禪門明修證與此果報云何同異荅修名習行
證名發得又修名習因證名習果皆卽生可獲今論

果報隔在來世以此爲異二乘但有習果無有果報
大乘具有云○第四爲通裂大綱諸經論故說是止
觀者若人善用止觀觀心則內慧明了通達漸頓諸
教如破微塵出大千經卷恒沙佛法一心中曉若欲
外益衆生逗機設教者隨人堪任稱彼而說乃至成
佛化物之時或爲法王說頓漸法或爲菩薩或爲聲
聞天魔人鬼十法界像對揚發起或爲佛所問而廣
答頓漸或扣機問佛佛答頓漸法輪此義至第九重
當廣說攝法中亦略示○第五歸大處諸法畢竟空
故說是止觀者夫膠手易著癡夢難惺封文齊意自
謂爲是競執瓦礫謂瑠璃珠近事顯語猶尚不識況

遠理密教寧當不惑爲此意故須論旨歸旨歸者文
旨所趣也如水流趣海火炎向空識密達遠無所稽
滯辭如智臣解王密語聞有所說皆悉了知到一切
智地得此意者卽解旨歸旨者自向三德歸者引他
同入三德故名旨歸又自入三德名歸令他入三德
名旨故名旨歸今更總別明旨歸諸佛爲一大事因
緣出現於世示種種像咸令衆生同見法身見法身
已佛及衆生俱歸法身又佛說種種法咸令衆生究
竟如來一切種智種智具已佛及衆生俱歸般若又
佛現種種方便神通變化解脫諸縛不令一人獨得
滅度皆以如來滅度而滅度之旣滅度已佛及衆生

俱歸解脫大經云安置諸子祕密藏中我亦不久自
住其中是名總相旨歸別相者身有三種一者色身
二者法門身三者實相身若息化論歸者色身歸解
脫法門身歸般若實相身歸法身般若說有三種一
說道種智二說一切智三說一切種智若息化論歸
道種智歸解脫一切智歸般若一切種智歸法身解
脫有三種一解無知縛二解取相縛三解無明縛若
息化歸真解無知縛歸解脫解取相縛歸般若解無
明縛歸法身以是義故別相旨歸亦歸三德祕密藏
中復次三德非三非一不可思議所以者何若謂法
身直法身者非法身也當知法身亦身非身非身非

非身住首楞嚴種種示現作衆色像故名爲身所作
辦已歸於解脫智慧照了諸色非色故名非身所作
辦已歸於般若實相之身非色像身非法門身是故
非身非非身所作辦已歸於法身達此三身無一異
相是名爲歸說此三身無一異相是名爲旨俱入祕
藏故名旨歸若謂般若直般若者非般若也當知般
若亦知非知非知非非知道種種智般若徧知於俗故
名爲知所作辦已歸於解脫一切智般若徧知於真
故名非知所作辦已歸於般若一切種智般若徧知
於中故名非知非非知所作辦已歸於法身達三般
若無一異相是名爲歸說三般若無一異相是名爲

旨俱入祕藏故名旨歸若謂解脫直解脫者非解脫也當知解脫亦脫非脫非脫非脫方便淨解脫調伏衆生不爲所染故名爲脫所作辦已歸於解脫圓淨解脫不見衆生及解脫相故非脫所作辦已歸於般若性淨解脫則非脫非非脫所作辦已歸於法身若達若說如此三脫非一異相俱入祕藏故名旨歸復次三德非新非故而新而故所以者何三障障三德無明障法身取相障般若無知障解脫三障先有名之爲故三德破三障今始得顯故名爲新三障卽三德三德卽三障三障卽三德三障非故三德卽三障三德非新非新而新則有發心所得之三德乃

至究竟所得之三德非故而故則有發心所治之三障乃至究竟所治之三障新非新故非故則有理性之三德若總達三德非新非故而新而故無一異相爲他亦然卽是旨歸祕密藏中又說者無明先有名爲故法身是明破於無明名爲新無明卽明明卽無明無明卽明無明非故明卽無明明則非新取相先有名之爲故無相破相無相名新相卽無相無相卽相何新何故無知先有名之爲故知破無知知名爲新無知卽知知卽無知何新何故若達總別新故無一異相若爲他說亦復如是是名旨歸入祕密藏縱橫開合始終等例皆如是復次旨歸亦復如是謂旨

非旨非旨非非旨歸非歸非歸非非歸一一悉須入
祕密藏中例上可解旨自行故非旨化他故非旨非
非旨無自他故旨歸三德寂靜若此有何名字而可
說示不知何以名之強名中道實相法身非止非觀
等亦復強名一切種智平等大慧般若波羅蜜觀等
亦復強名首楞嚴定大涅槃不可思議解脫止等當
知種種相種種說種種神力一一皆入祕密藏中何
等是旨歸旨歸何處誰是旨歸言語道斷心行處滅
永寂如空是名旨歸至第十重中當廣說也

摩訶止觀卷第二下

摩訶止觀卷第三上

天台智者大師說

△第二釋止觀名者大途梗概已如上說復以何義立止觀名略有四一相待二絕待三會異四通三德一相待者止觀各三義息義停義對不止止義息義者諸惡覺觀妄念思想寂然休息淨名曰何謂攀緣謂緣三界何謂息攀緣謂心無所得此就所緣得名是止息義停義者緣心諦理繫念現前停住不動仁王云入理般若名爲住大品云以不住法住般若波羅蜜中此就能止得名卽是停止義對不止以明止者語雖通上意則永殊何者上兩止對生死之流動

約涅槃論止息心行理外約般若論停止此約智斷
通論相待今別約諦理論相待無明卽法性法性卽
無明無明亦非止非不止而喚無明爲不止法性亦
非止非不止而喚法性爲止此待無明之不止喚法
性而爲止如經法性非生非滅而言法性寂滅法性
非垢非淨而言法性清淨是爲對不止而明止也觀
亦三義貫穿義觀達義對不觀觀義貫穿義者智慧
利用穿滅煩惱大經云利鏤斲地磐石砂礫直至金
剛法華云穿鑿高原猶見乾燥土施功不已遂漸至
泥此就所破得名立貫穿觀也觀達義者觀智通達
契會真如瑞應云息心達本源故號爲沙門大論云

清淨心常一則能見般若此就能觀得名故立觀達
觀也對不觀觀者語雖通上意則永殊上兩觀亦通
對生死彌密而論貫穿迷惑昏盲而論觀達此通約
智斷相待明觀今別約諦理無明卽法性法性卽無
明無明非觀非不觀而喚無明爲不觀法性亦非觀
非不觀而喚法性爲觀如經云法性非明非闇而喚
法性爲明第一義空非智非愚而喚第一義空爲智
是爲對不觀而明觀也是故止觀各從三義得名○
二絕待明止觀者卽破前三相待止觀也先橫破次
豎破若止息止從所破得名者照境爲正除惑爲傍
旣從所離得名名從傍立卽墮他性若停止止從能

破得名照境爲正除惑爲傍旣言能照名從智生卽
墮自性若非妄想息故止非住理故止智斷因緣故
止名從合生卽墮共性若非所破非能破而言止者
此墮無因性故龍樹曰諸法不自生亦不從他生不
共不無因是故說無生無生止觀豈從四句立名四
句立名是因待生可思可說是結惑生可破可壞起
滅流動之生何謂停止迷惑顛倒之生何謂觀達耶
又豎破者若從四句生者卽是生生非止觀也若能
止息見思停住真諦此乃待生生說生不生之止觀
耳若以空心入假止息塵沙停住俗理此乃待生不
生說不生生之止觀耳若止息無明停心中理此是

待生死涅槃二邊不止而論止觀耳皆是待對可思議生結惑可破壞尚未是止何況不止猶自非觀何況不觀何以故遣執不盡故言語道不斷故業果不絕故今言絕待止觀者絕橫豎諸待絕諸思議絕諸煩惱諸業諸果絕諸教觀證等悉皆不生故名爲止止亦不可得觀冥如境境旣寂滅清淨尚無清淨何得有觀止觀尚無何得待不止觀說於止觀待於止觀說不止觀待止不止說非止非不止故知止不止皆不可得非止非不止亦不可得待對旣絕卽非有爲不可以四句思故非言說道非心識境旣無名相結惑不生則無生死則不可破壞滅絕滅故名絕

待止顛倒想斷故名絕待觀亦是絕有爲止觀乃至
絕生死止觀絕待止觀則不可說若有四悉檀因緣
故亦可得說若有世界因緣則會異而說若有爲人
因緣則通三德而說若有對治因緣則相待而說若
有第一義因緣則絕待而說說爲止觀此之名字不
在內外兩中間亦不常自有是字不住亦不住是
字不在橫四句豎四句中故言是字不住亦不在無
橫無豎中故言亦不住是字不可得故故名絕待
止觀亦名不思議止觀亦名無生止觀亦名一大事
止觀故如此大事不對小事譬如虛空不因小空名
爲大也止觀亦爾不因愚亂名爲止觀無可待對獨

一法界故名絕待止觀也世人約種種語釋絕待義終不得絕何以故凡情馳想種種推畫分別悟與不悟心與不心凡聖差別絕則待於不絕不思議待思議輪轉相待絕無所寄若得意亡言心行亦斷隨智妙悟無復分別亦不言悟不悟聖不聖心不心思議不思議等種種妄想緣理分別皆名爲待真慧開發絕此諸待絕卽復絕如前火木名爲絕待故淨名云諸法不相待乃至一念不住故卽此意也若爾絕待乃是聖境初心無分今以六卽望之初心無所失聖境無所濫三會異者如此絕待止觀亦名不可思議亦名爲大大經云大名不可思議也諸餘經論或名

遠離或名不住不著無爲寂滅不分別禪定棄除捨等如是一切皆是止之異名止既絕大不可思議遠離等皆絕大不可思議餘處或名知見明識眼覺智慧照了鑒達等如是一切皆是觀之異名觀既絕大不可思議知見等皆絕大不可思議所以者何般若是一法佛說種種名解脫亦爾多諸名字亦如虛空無所有不動無礙當知三德祇是一法隨衆生類爲之立異字若聞絕待慎莫驚畏若聞會異慎莫疑惑而自毀傷也又止觀自相會者止亦名觀亦名不止觀亦名止亦名不觀卽前釋名意同也○四通三德者若衆經異名皆是止觀者名則無量義亦無量何

故但以三義釋止觀耶爲對三德作此釋耳諸法無量何故獨對三德大論云菩薩從初發心常觀涅槃行道大經云佛及衆生皆悉安置祕密藏中祕藏卽是涅槃涅槃卽是三德三德卽是止觀自他初後皆得修入故用對之耳若用兩字共通三德者止卽是斷斷通解脫觀卽是智智通般若止觀等者名爲捨相捨相卽是通於法身又止卽奢摩他觀卽毗婆舍那他那等故卽憂畢義通三德如前問止觀是二法豈得通不思議三德耶答還以不思議止觀故得通耳又大品明十八空釋般若百八三昧釋禪雖前後兩釋豈可禪無般若般若無禪特是不二而二二則

不二不二卽法身二卽定慧如此三法未曾相離是故大經云佛性有五種名或名首楞嚴或名般若今非止非觀或名爲止或名爲觀卽是不思議止觀通於不思議三德復次止觀各通三德者止中有觀觀中有止如止息止是止善屬定門攝卽通解脫停止是行善屬觀門攝卽通般若若非止止屬理攝卽通法身其義可見也貫穿觀是止善定門攝卽通解脫觀達觀是行善觀門攝卽通般若若非觀觀理攝卽通法身意亦可見復次止觀共通三德者止息止貫穿觀皆從所離得名卽通解脫停止觀達觀皆從能緣之智得名卽通般若若非止止非觀觀皆名法性卽

通法身復次三德通於止觀者還以三德共通兩字
又應三德各通兩字三德共通者解脫通止般若通
觀法身通非止非觀三德各通止觀者夫解脫者具
足解脫具有三種方便淨解脫通止息止圓淨解脫
通停止止性淨解脫通非止止夫般若者具足般若
具有三種道慧般若通貫穿觀道種慧般若通觀達
觀一切種慧般若通非觀觀具足法身亦有三種色
身通一止一觀法門身通一止一觀實相身通一止
一觀其義可見也若信三德絕大不思議通義既明
須信止觀絕大不思議若信涅槃三法具足名祕密
藏亦信三止具足名大寂定名祕密藏亦信三觀具

足名大智慧名祕密藏亦信非止非觀三法具足名
祕密藏若信三德不縱不橫不並不別如三點三目
者亦信三止三觀不縱不橫不並不別也而諸經赴
緣偏舉一法以示義端如首楞嚴偏舉止邊止具一
切法不減少亦名祕密藏智度法華偏舉觀邊觀具
一切法不減少涅槃舉三法具足法亦不多亦名祕
密藏止觀亦爾若開若合開亦不多合亦不少一一
皆是法界攝一切法悉名祕密藏偏舉尚爾况圓舉
耶止觀通三德既爾通諸異名遠離知見等亦如是
又通諸三名所謂三菩提三佛性三寶等一切三法
亦如是問云何字義縱橫云何字義不縱不橫答諸

小乘師說般若種智已圓果縛尚在解脫未具身猶
雜食又帶無常一優二劣譬之橫川走火又云先有
相好之身次得種智般若後滅身智方具解脫既有
上下前後之義譬之縱三點水若入滅定有身而無
智羅漢在無色有智而無身若入無餘但有孤調解
脫此義各各不相關並之則橫累之則縱分之則異
諸大乘師說法身是正體有佛無佛本自有之非適
今也了因般若無累解脫此二當有隔生跨世彌亘
淨穢此字義縱也又言三德無前後一體具足以體
從義而有三異蓋乃體橫而義縱耳又言體義俱不
殊而有隱顯之異俱不異未免橫隱顯異未免縱衆

釋如此寧與經會今明三德皆不可思議那忽縱皆不可思議那忽橫皆不可思議那忽一皆不可思議那忽異此約理藏釋身常智圓斷具一切皆是佛法無有優劣故不縱三德相冥同是一法界出法界外何處更別有法故不橫能種種建立故不一同歸第一義故不異此約行因釋也卽一而三故不橫卽三而一故不縱不三而三故不一不一而一故不異此約字用釋也真伊字義爲若此問三德四德其意云何荅通論三德一一皆常樂我淨大經云諸佛所師所謂法也以法常故諸佛亦常法卽法身佛卽般若解脫故作通解也大經云因滅是色獲得常色受想

行識亦復如是則法身皆常樂我淨二德亦然若依
一種轉色成法身法身常樂轉識想成般若般若卽
淨轉受行成解脫解脫則我又依念處轉識成常轉
受成樂轉想行成我轉色成淨是則通別各有二解
依圓是頓義依別是漸義云問三障及三道皆障三
德三障開通至極三道四倒亦應開通至極答例何
者業有三種謂漏業無漏業非漏業非無漏業感於三
報謂分段方便實報報由三種煩惱謂取相塵沙無
明也又約三種報一一開三道約三種煩惱一一開
四倒△第三釋上觀體相者既知大意豁達如前名
字曠遠若向須識體理淵玄麗寄四意顯體一教相

二眼智三境界四得失夫理藉教彰教法既多故用
相顯入理門不同故用眼智顯諦有權實故用境界
顯人有差會故用得失顯法華疏用四一明實今以
四科顯體可得相類教相顯者夫止觀名教通於凡
聖不可尋通名求於別體故用相簡之若凡夫止善
所治是止相行善所生是觀相又四禪四無量心是
止相六行是觀相此等皆未免生死卽有漏爲相故
大論云除摩黎山餘無出旃檀除三乘智慧餘無眞
智慧故非今所論也若二乘以九想十想八背捨九
次第定多是事禪一往止相有作四諦慧是觀相此
之止觀雖出生死而是拙度減色入空此空亦得名

止亦得名非止非不止而不得名觀何以故灰身滅智故不名觀但是折法無漏爲相非今所論也巧度止有三種一體真止二方便隨緣止三息二邊分別止一體真止者諸法從緣生因緣空無主息心達本源故號爲沙門知因緣假合幻化性虛故名爲體攀緣妄想得空卽息空卽是真故言體真止二方便隨緣止者若三乘同以無言說道斷煩惱入真真則不異但言煩惱與習有盡不盡若二乘體真不須方便止菩薩入假正應行用知空非空故言方便分別藥病故言隨緣心安俗諦故名爲止經言動止心常一亦得證此意也三息一邊分別止者生死流動涅槃

保證皆是偏行偏用不會中道今知俗非俗俗邊寂
然亦不得非俗空邊寂然名息二邊止此三止名雖
未見經論映望三觀隨義立名釋論云菩薩依隨經
教爲作名字名爲法施立名無咎若能尋經得旨卽
懸合此義也詳此三止與前釋名名髣髴同其相則
異同者止息止似體真停止止似方便隨緣非止止
似息二邊其相則別所謂三諦相也前三成次三後
一具前三何以故如體真止時達因緣假名空無主
流動惡息是名止息義停心在理正是達於因緣是
停止義此理卽真真卽本源源不當止與不止是
非止止此三義共成體真止相若方便止時照假自

在散亂無知息是止息義停心假理如淨名入三昧
觀比丘根性分別藥病是停止義假理不動是非止
止如是三義共成方便隨緣止相也息二邊時生死
涅槃二相俱息是止息義入理般若名爲住緣心中
道是停止義此實相理非止不止是不止止義如此
三義共成息二邊止相故與前永異也亦非今所用
也次明觀相觀有三從假入空名二諦觀從空入假
名平等觀二觀爲方便道得入中道雙照二諦心心
寂滅自然流入薩婆若海名中道第一義諦觀此名
出纓絡經所言二諦者觀假爲入空之詮空由詮會
能所合論故言二諦觀又會空之日非但見空亦復

識假如雲除發障上顯下明由真假顯得是二諦觀
今由假會真何意非二諦觀又俗是所破真是所用
若從所破應言俗諦觀若從所用應言真諦觀破用
合論故言二諦觀又分別有三種一約教有隨情
諦觀約行有隨情智二諦觀約證有隨智二諦觀初
觀之功雖未契真得有隨教隨行論二諦觀問初觀
破用合受名第二觀亦破用亦應言二諦耶答前已
受二諦名後雖破用更從勝者受平等名也問第三
觀亦破用何不更從勝受名答前兩觀有滯故更破
更用第三觀無滯但從用受名不得一例問前二觀
俱觀二諦亦應俱入二諦答初爲破病故觀假爲用

真故觀真是故俱觀一用一不用故不俱入問冀及
中俱得稱諦界內外俗俗則非理云何稱諦答地持
明二法性一事法性性差別故二實法性性真實故
卽二諦之異名旣俱得稱法性何意不得俱稱諦問
若爾俱稱涅槃答經云貧人得寶乃至獼猴得酒又
非想定卽世俗涅槃卽其義也問若爾俱無漏耶答
論云世間正見出世正見問若爾俱無生耶答經云
異相互無問從假入空必須破假而入空耶答通途
應有四句不破入破入破不入不破不入乃至三十
六句如後說從空入假名平等觀者若是入空尚無
空理有何假可入當知此觀爲化衆生知真非真方

便出假故言從空分別藥病而無差謬故言入假平等者望前稱平等也前觀破假病不用假法但用真法破一不破一未爲平等後觀破空病還用假法破用既均異時相望故言平等也今當譬之如盲初得眼開見空見色雖見於色不能分別種種卉木根莖枝葉藥毒種類從假入空隨智之時亦見二諦而不能用假若人眼開後能見空見色卽識種類洞解因緣麤細藥食皆識皆用利益於他此譬從空入假亦具真俗正用於假爲此衆生故名爲入假復言平等意如前說中道第一義觀者前觀假空是空生死後觀空空是空涅槃雙遮二邊是名二空觀爲方便道

得會中道故言心心寂滅流入薩婆若海又初觀用
空後觀用假是爲雙存方便入中道時能雙照二諦
故經言心若在定能知世間生滅法相前之兩觀爲
二種方便意在此也問大經云定多慧多俱不見佛
性此義云何荅次第三觀二乘及通菩薩有初觀分
此屬定多慧少不見佛性別教菩薩有第二觀分此
屬慧多定少亦不見佛性二觀爲方便得入第三觀
則見佛性問經言十住菩薩以慧眼故見不了了非
全不見初觀是慧眼位第二觀是法眼位云何而言
兩眼全不見耶荅彼次第眼偏定偏慧佛之所呵不
可言其見也所言慧眼見者其名乃同實是圓教十

住之位三觀現前入三諦理名之爲住呼住爲慧眼耳故法華云願得如世尊慧眼第一淨如斯慧眼分見未了故言如夜見色空中鷺鴈非二乘慧眼得如此名故法華中譬如有人穿鑿高原唯見乾土施功不已轉見溼土遂漸至泥後則得水乾土譬初觀溼土譬第二觀泥譬第三觀水譬圓頓觀又譬於教三藏教不詮中道如乾土通教如溼土別教如泥圓教詮中道如水二教之所不詮二行之所不到偏空慧眼寧得見性若見性者無有是處此三觀與前三觀名一往似同義相則異同者前是貫穿觀諸虛妄似從假入空也前觀達觀達理理和達事事和似入假

平等觀也前不觀觀似中道也其相異者前是一諦相今是三諦相又前三觀通成後三後三具前三所以者何如從假入空破四住磐石此豈非貫穿義所入之空空卽是理智能顯理卽觀達義此之空理卽是非觀觀義如此三義共成入空觀相也從空入假亦具三義何以故識假名法破無知障卽是貫穿義照假名理分別無謬卽觀達義假理常然卽不觀觀義也此三義共成假觀相中道之觀亦具三義空於二邊卽貫穿義正入中道卽觀達義中道法性卽不觀觀義如此三義共成中道觀相此依摩訶衍明三止三觀之相以義隨相條然各別若論三觀則有權

實淺深若論三智則有優劣前後若論三人則有諸位大小此則次第分張非今所用也圓頓止觀相者以止緣於諦則一諦而三諦以諦繫於止則一止而三止譬如三相在一念心雖一念心而有三相止諦亦如是所止之法雖一而三能止之心雖三而一也以觀觀於境則一境而三境以境發於觀則一觀而三觀如摩醯首羅面上三目雖是三目而是一面觀境亦如是觀三卽一發一卽三不可思議不權不實不優不劣不前不後不並不別不大不小故中論云因緣所生法卽空卽假卽中又如金剛般若云如人有目日光明照見種種色若眼獨見不應須日若無

色者雖有日眼亦無所見如是三法不異時不相離
眼喻於止日喻於觀色喻於境如是三法不前不後
一時論三三中論一亦復如是若見此意卽解圓頓
教止觀相也何但三一三總前諸義皆在一心其
相云何體無明顛倒卽是實相之真名體真止如此
實相徧一切處隨緣歷境安心不動名隨緣方便止
生死涅槃靜散休息名息二邊止體一切諸假悉皆
是空空卽實相名入空觀達此空時觀冥中道能知
世間生滅法相如實而見名入假觀如此空慧卽是
中道無二無別名中道觀體真之時五住磐石砂礫
一念休息名止息義心緣中道入實相慧名停止義

實相之性卽非止非不止義又此一念能穿五住達
於實相實相非觀亦非不觀如此等義但在一念心
中不動真際而有種種差別經言善能分別諸法相
於第一義而不動雖多名字蓋乃般若之一法佛說
種種名衆名皆圓諸義亦圓相待絕待對體不可思
議不可思議故無有障礙無有障礙故具足無減是
圓頓教相顯止觀體也○二明眼智者體則非知非
見非因非果說之已自難何況以示人雖叵知見由
於眼智則可知見雖非因果由因果顯止觀爲因智
眼爲果因是顯體之遠由果是顯體之近由其體冥
妙不可分別寄於眼智令體可解今先明次第眼智

者三止三觀爲因所得三智三眼爲果三止者若體
真止妄惑不生因止發定定生無漏慧眼開故見第
一義真諦三昧成故止能成眼眼能見體得真體也
若隨緣止冥真出假心安俗諦因此止故得陀羅尼
陀羅尼分別藥病法眼豁開破障通無知常在三昧
不以二相見諸佛土則俗諦三昧成是則止能發眼
眼能得體得俗體也若息二邊止則生死涅槃空有
雙寂因於此止發中道定佛眼豁開照無不徧中道
三昧成故止能得眼眼能得體得中道體也三觀者
若從假入空空慧相應卽能破見思惑成一切智智
能得體得真體也若從空入假分別藥病種種法門

卽破無知成道種智智能得體得俗體也若雙遮二
邊爲入中方便能破無明成一切種智智能得體得
中道體也是則三止三觀共成三眼三智各得三體
是故顯體而談眼智卽此意也問眼見智知知見異
耶荅此應四句分別知而非見見而非知亦知亦見
不知不見凡夫不證故不見不聞故不知二乘人證
故亦見聞故亦知支佛證故是見不聞故不知方便
道人聞故是知未證故不見復次信行人因聞故有
慧因慧故發無漏得一切智此智因聞故稱智知法
行人思惟得定因定發無漏成慧眼此眼因禪故稱
眼見然知見同證真諦從所因處仍本受名故言知

見也此就慧眼一切智作此分別餘二眼二智例爾
若一心眼智則不如此若明不次第止觀眼智者如
前所說止卽是觀觀卽是止無二無別得體近由亦
如是眼卽是智智卽是眼眼故論見智故論知知卽
是見見卽是知佛眼具五眼佛智具三智王三昧一
切三昧悉入其中首楞嚴定攝一切定大品云欲得
道慧道種慧一切智一切種智當學般若問釋論云
三智在一心中云何言欲得道慧等當學般若荅實
爾三智在一心中爲向人說令易解故作如此說耳
金剛般若云如來有肉眼不荅云有乃至如來有佛
眼不荅云有雖有五眼實不分張祇約一眼備有五

用能照五境所以者何佛眼亦能照麤色如人所見亦過人所見名肉眼亦能照細色如天所見亦過天所見名天眼達麤細色空如二乘所見名慧眼達假名不謬如菩薩所見名法眼於諸法中皆見實相名佛眼當知佛眼圓照無遺故經云五眼具足成菩提永與三界作父母而獨稱佛眼者如衆流入海失本名字非無四用也佛智照空如二乘所見名一切智佛智照假如菩薩所見名道種智佛智照空假中皆見實相名一切種智故言三智一心中得故知一心三止所成三眼見不思議三諦此見從止得故受眼名一心三觀所成三智知不思議三境此智從觀得

故受智名境之與諦左右異耳見之與知眼目殊稱不應別說今將境來顯智令三觀易明用諦來目眼使三止可解雖作三說實是不可思議一法耳用此一法眼智得圓頓止觀體也如此解釋本於觀心實非讀經安置次比爲避人嫌疑爲增長信幸與脩多羅合故引爲證耳○三明境界者若得能顯眼智中意無俟所顯諦境之說爲未解者更此一科夫信行尚多聞因此分別以會圓妙法行宗深觀緣此思惟以見正境耳就此爲二一明說境意二明諸境離合經云爲諸衆生開佛知見若無中境智無所知眼無所見當知應有佛眼境也經云世孰有真天眼者不

以三相見諸佛土若無俗境此眼不應見於佛土經云天眼開闢慧眼見真故知應有慧眼境也此三諦理不可思議無決定性實不可說若爲緣說不出三意一隨情說卽隨他意語二隨情智說卽隨自他意語三隨智說卽隨自意語云何隨情說三諦如盲不識乳便問他言乳色何似他人荅言色白如貝糝雪鶴等雖聞此說亦不能了乳之真色是諸盲人各各作解競執貝糝而起四諍凡情愚翳亦復如是不識三諦大悲方便而爲分別或約有門明三諦如盲聞貝或約空門明三諦如盲聞糝或作空有門明三諦如盲聞雪或作非空非有門明三諦如盲聞鶴雖聞

此說未卽諦理是諸凡夫終不能見常樂我淨真實之相雖未得見各執空有互相是非所以常途解二諦者二十三家家家不同各各異見皆引經論莫知孰是若言併是理則無量若言併非悉有所據爲此義故執自非他雖飲甘露傷命早夭經稱文殊彌勒未悟之時共諍二諦兩墮地獄今世凡情偏執一文鏗然固著雖謂爲能恐乖佛旨如是等人皆未識隨情三諦若識此意聞種種說卽知如來俯逐根情根情旣多說不一種此卽是隨他意而說三諦也隨情智說三諦者就情說二就智說一若爾不得一所論三此就凡情凡情悉是方便雖卽一而三但束爲二

若就聖智聖智皆是實得雖卽一而三但束爲一情
智相望故言三諦如相似位人六根淨時猶未發真
見於中道雖觀三諦約位往明但破四住及塵沙惑
旣證方便道但束爲二諦若入初住破無明見佛性
雙照二諦方稱爲智亦具三諦但束爲中道第一義
諦情智合論卽是隨自他意語也隨智說三諦者從
初住去非但說中絕於視聽真俗亦然三諦玄微唯
智所照不可示不可思聞者驚怪非內非外非難非
易非相非非相非是世法無有相貌百非洞遣四句
皆亡唯佛與佛乃能究盡言語道斷心行處滅不可
以凡情圖想若一若三皆絕情望尚非二乘所測何

況凡夫如乳真色眼開乃見徒費言語盲終不識如是說者名爲隨智說三諦相也卽是隨自意語今更引經中所明二諦文顯成三諦之說若言凡夫人卽能體達因緣生於觀解豈非隨情說俗體因緣卽空豈非隨情說真若如此者卽是隨情說二諦也若言凡夫心所見名爲俗諦聖人心所見名爲真諦如此說者豈非隨情智說二諦也若言凡夫行世間不知世間相凡夫尚不知世間之俗那得知真故知二諦皆非凡情所識如此說者豈非隨智說二諦二諦既有三番說三諦例此可解疑者若言佛常依二諦說法故有三番二諦意今亦例此佛常好中道降胎出

生出家成道入滅皆在中夜一色一香無非中道若說中道豈不三意赴緣耶又一一說各具四悉檀意隨情中四意者夫諦理不可說說必寄言言必契情情必欣悅或聞真歡喜或聞俗歡喜或聞中歡喜此卽是隨情中用世界悉檀意也夫衆生便宜不同或聞說無戒慧增長或聞說有戒慧增長或聞說中戒慧增長此卽隨情中用爲人悉檀意也夫行者破惡不同或聞有法能破睡眠覺觀等或聞無法能破睡眠等或聞中法能破睡眠散等此卽隨情中用對治悉檀意也夫衆生入悟不同或聞無開解或聞有超悟或聞中發徹乃至觀心亦爾或說有觀悅如雲影或

作無觀泯失身心或作中觀神智明白如是等種種
不同應在一不在二應在二不在一故云佛說生法
於無生法得度佛說無生法於生法得度此卽是用
第一義悉檀意也故法華云佛知衆生種種欲種種
行種種性種種憶想卽此四意何故爾種種欲是隨
世界種種性是生善種種行是對治種種憶想是第
一義何故性屬生善行屬對治破惡耶若通論性善
有冥有顯行惡亦有冥有顯今從義便善是冥伏惡
是彰露如佛未出時三乘善根冥伏不現故言善性
冥也若聞三諦此善發生故知種種性應屬生善可
對爲人悉檀也又佛未出時諸衆生惡行彰顯邪非

僻倒過失現前佛爲破此惡故說於三諦故知種種
行屬破惡卽對諦悉檀也種種憶想是第一義者想
是慧數僻故成心倒見倒等若遇知識正此想慧
成三不倒佛欲正其此慧故說三諦卽第一義也隨
情說三諦旣具四意隨情智隨智說三諦例此可解
是則三十二種說三諦不同豈可以凡情局聖謂
唯一種執諍自毀耶若知聖說無崖終不是此非彼
起增上慢高舉稜層如有智盲人莫諍乳色勤行方
便慙愧有羞以三止證三眼見三法獲三智知三諦
見中分明雙照曉了如雲除發障上顯下明尔時乃
可諦審是非決定師子吼也私謂隨情是併與隨情

智是半與半奪隨智是併奪何者如聖語凡云汝今
心想卽是俗能體達俗虛卽是真豈非併與相汝今
所知百千推畫皆是俗唯聖別知乃是真豈非半與
半奪相夫二諦者凡人併不識上聖獨能知此豈非
併奪此釋易解故錄之二明境智離合者先境次智
衆經說諦或四三二一離合不同今當通說三藏是
方便之教但明二諦菩薩初心中心緣真伏於四住
今煩惱脂消三阿僧祇修六度行使功德身肥百劫
種相好獲五神通得法眼照俗諦分別根性調熟衆
生而作佛事後心坐道場三十四心斷見思惑盡此
三十四心八忍八智九無礙九解脫合爲三十四心

也又經言一念六百生滅成論師云一念六十剎那
祇是一念從假入空得慧眼照真諦而得成佛前已
照俗次復照真二諦雙明與弟子異菩薩但照俗不
照真二乘但照真不照俗佛能兼俱更加中道第一
義諦三藏二諦已是方便於二諦上更加中道方便
之上更復方便照見此諦更加佛眼知此諦故更加
一切種智離則有二合則有三是爲三藏法中二諦
三諦離合之相也次三乘人同以無言說道斷煩惱
論諦離合者俗諦則同真諦則異大論云空有二種
一但空二不但空大經云二乘之人但見於空不見
不空智者非但見空能見不空不空卽大涅槃二乘

但空智如螢火菩薩之人智慧如日既空異智別則
有兩諦之殊而今合爲一真諦二乘體假入真祇入
但空不能從但空入假無化他之用菩薩體假入但
真能從但空入假化度衆生淨佛國土上根菩薩體
假入真前入但空次入不但空則破無明見佛性與
前真永別豈可同爲一真諦耶昔莊嚴家云佛果出
二諦外得此片意而作義不成不知佛智別照何境
別斷何惑若得今意出外義則成關善家云佛果不
出二諦外不能動異二乘作義復不成若得此意不
出義亦成古來名此爲風流二諦意在此但空不但
空合時祇是一真諦離時成兩真諦與三藏家異彼

三藏第三諦但有中道名無別體眼無別見智無別知今則不爾第三諦亦名真諦一名中道第一義諦有別體別見別知是爲通教二諦三諦離合之相也次別教明二諦與前求異前之真俗合爲別家之俗俗者是世界隔別俗有真無凡夫爲俗諦所攝二乘爲真諦所攝既有無之異故稱爲俗勝鬘名二乘作空亂意衆生大經云我與弥勒共論世諦五百聲聞謂說真諦若論二諦俗諦不開若作三諦開有爲俗開無爲真對不但空爲第一義諦是爲別教離合之相也

摩訶止觀卷第三上

摩訶止觀卷第三下

天台智者大師說

次圓教但明一實諦大經云實是一諦方便說二今亦例此實是一諦方便說三法華云更以異方便助顯第一義耳是爲圓教二諦三諦一諦離合之相也次明四諦離合者前三諦二諦一諦皆豎辨四諦則橫論則有四種四諦謂生滅無生滅無量無作等生滅四諦卽是橫開三藏二諦也無生四諦卽是橫開通教二諦也無量四諦卽是橫開別教二諦也無作四諦卽是橫開圓教一實諦也今將中觀論合此四番四諦論云因緣所生法者卽生滅四諦也我說卽

是空卽無生四諦也亦爲是假名卽無量四諦也亦
名中道義卽無作四諦也二明智離合者諸經或說
一智二三四乃至十一智等若說三智可用觀三諦
如其增減當云何觀一智者經云一切諸如來同共
一法身一心一智慧力無畏亦然唯一佛智卽一切
種智一相寂滅相種種行類相貌皆知名一切種智
此智觀三諦者若言一相寂滅相卽是觀於中道若
言種種行類相貌皆知者卽是雙照二諦也若二智
者所謂權實權卽一切智道種智觀於有無兩諦也
實卽一切種智觀於中道諦也三智觀三諦可解不
說四智者如大品明道慧道種慧一切智一切種智

釋論解此有多種或因中但有理體名爲道慧道種
慧果上事理皆滿名一切智一切種智或言因中權
實故言道慧道種慧入空爲實慧入假爲權慧或言
果上權實故言一切智一切種智直緣中道名一切
智雙照二諦名一切種智或言因中總別果上總別
或言道慧道種慧是單明權實一切智一切種智是
復明權實如是等種種釋四智四智祇是照三諦也
若經中有明五諦六七八九乃至無量者但得此意
釋之使入三諦也十一智者世智他心智兩種照俗
諦八智觀真諦如實智觀中道是名智有離合而三
諦不動復次智諦俱開者隨其多少自相攝如三諦

卽有三智二諦卽有二智此義可解又智諦俱不開者且據一諦一智不增不減此亦可解若智雖開合終是實智能顯實體也次約諦智合辨者三藏真諦發一眼一智俗諦發一眼一智兩諦共發一眼一智慧眼一切智緣真諦法眼道種智緣俗諦佛眼一切種智共緣真俗兩諦不得道雙照祇得道前後共照耳通教真諦發二眼二智俗諦發一眼一智一切智一切種智共緣真諦道種智緣俗諦若作別接通者俗諦發一眼一智真諦發一眼一智開真出中發一眼一智智緣諦亦如是別教三諦一一諦各發一眼一智智緣諦亦如是若別教作二諦者俗中空發一

眼一智俗中有發一眼一智真諦發一眼一智智緣
諦亦如是圓教者一實諦發三眼三智智緣諦亦如
是問云何以別接通答初空假二觀破真俗上惑盡
方聞中道仍須修觀破無明能八相作佛此佛是果
仍前二觀爲因故言以別接通耳不以此佛果接三
阿僧祇百劫種相之因故不接三藏不將此果接十
地之因故不接別不將此果接十住斷無明故不接
圓唯得以別接通其義如此○四明得失者失卽思
議得卽不思議也若言智由心生自然照境如炬照
物若照未照此物本有若觀不觀境自天然諦智不
相由藉若言智不自智由境故智境不自境由智故

境如長短相待此是相由而有若言境不自境亦不由智故境境智因緣故境智亦例然此是共合得名若言皆不如上三種但自然而爾卽是無因境智此四解皆有過所以者何有四取則有依倚依倚則是非是非則愛恚愛恚生一切煩惱煩惱生故戲論諍競生諍競生故起身口意業業生故輪迴苦海無解脫期當知四取是生死本故龍樹伐之諸法不自生那得自境智無他生那得相由境智無共生那得因緣境智無無因生那得自然境智若執四見著愚惑紛綸何謂爲智今以不自生等破四性性破故無依倚乃至無業苦等清淨心常一則能見般若以是義

故自境智苦集不生卽是生生不可說故身子默然
乃至無因境智苦集不生卽是不生不生不可說故
淨名杜口言語道斷心行處滅雖不可說有四悉檀
因緣故亦可得說或說自生境智乃至或說無因境
智雖作四說性執久破如前但有名字名字無性無
性之字是字不住亦不住是爲不可思議故金光
明云不可思議智境不可思議智照卽此意也若破
四性境智此名實慧若四悉檀赴緣說四境智者此
名權慧如是境智凡夫兩失二乘一得一失菩薩兩
得何以故凡夫有四性自行爲失無四悉檀化他爲
失二乘破四性入第一義自行爲得不度衆生化他

爲失菩薩具足是故兩得又凡夫兩失是思議失二
乘一得一失俱是思議菩薩兩得俱不思議此約通
教辨得失若別望通通教兩得俱是思議別教兩得
俱不思議若圓望別別教教道兩得俱是思議何以
故教門方便或言無明生一切法或言法性生一切
法或言緣修顯真修或言真自顯執此還成性過墮
可思議中也若證道者卽不思議也若圓教教證俱
不思議何故爾至理無說爲緣四說但有假名假名
之名名卽無生故教證俱不可思議也無思無念故
無依倚戲論結業無業故無生死是名自行爲得得
於實體能以不可說說化導衆生令出生死得於實

體是爲自他俱得體也入第四明攝法者疑者謂止觀名略攝法不周今則不然止觀總持偏收諸法何者止能寂諸法如灸病得穴衆患皆除觀能照理如得珠玉衆寶皆獲具足一切佛法大品有百二十條及一切法皆言當學般若般若祇是觀智觀智已攝一切法又止是王三昧一切三昧悉入其中今更廣論攝法卽爲六意一攝一切理二攝一切惑三攝一切智四攝一切行五攝一切位六攝一切教此六次第者有佛無佛理性常住由迷理故起生死惑順理而觀是故論智解故立行由行故證位位滿故教他事理解行因果自他等次第皆止觀攝盡也○一以

三止三觀攝一切理者理是諦法如上開合偏圓不同權實之外更無別理除摩黎山餘無梅檀若更有者卽是妄語旣以止觀顯體卽攝一切理也○二止觀攝一切惑者以迷諦故起生死惑迷卽無明若迷權理則有界內相應獨頭等無明與見思諸使合者名相應不相應者名獨頭是事不知故起貪不知者是無明起貪是行貪者是識識共四陰起是名色色動諸根是六入六入所著是觸觸隨順塵是受受所喜樂是愛愛俱生纏是取造當來生業是有未來陰起是生陰熟是老捨陰是死是十二輪更互爲因果煩惱通業業通苦苦通煩惱故名三道成論云前行

後三中後行前七中七是業復是道能通後世後三
非業而能通七亦得是道經中亦呼爲十二牽連十
二輪束縛不窮故名爲輪三世間隔故名分段覆真
諦理不得解脫此卽是病說病卽知藥藥卽從假入
空止觀觀藥卽知病故此或爲入空止觀所攝也若
迷實理則有界外相應獨頭等無明所以者何界內
雖斷相應獨頭而習氣猶在小乘中習非正使大乘
實說習卽別惑是界外無明也故實性論云二乘之
人雖有無常苦空無我等對治於佛法身猶是顛倒
顛倒卽是無明獨頭無漏智業爲行三種意生身亦
是五種意生身意卽是識身卽名色六入觸受無明

細惑戲論未究竟滅卽是愛取煩惱染業染生染未
究竟卽是有三種意因移卽是生其果變易卽是老
死束此十二是無漏界中四種障謂緣相生壞緣卽
煩惱道相卽業道生壞卽苦道故知界外有十二因
緣所以者何降佛已下皆有無明無明潤業業旣被
潤那得無苦此十二輪雖不退界墮下不妨從無明
輪至老死從老死輪至無明障於實理良由此惑此
惑爲入假入中兩觀所治更料簡之何以故三種意
生身凡有多種若析體二乘及通菩薩等先斷界內
惑盡而未曾修習假中者生於界外界外惑全未被
伏其根則鈍若於彼習觀時必須次第歷劫修行學

恒沙佛法先破塵沙塵沙雖不潤生能障化道故須
前斷斷此惑者止是調心方便伏界外惑進斷三道
相應獨頭枝本皆去故知假觀正攝得塵沙亦攝得
無明若別圓二人通惑先盡別惑被伏生彼界者神
根卽利但修中觀治彼三道從於初地乃至後地地
地中皆有三道地地無明分分滅業滅苦滅地地相
應去時獨頭亦去地地雖有智智與無明雜故亦
得呼爲智障障上分智故唯佛心中無無明則煩惱
道盡煩惱道盡故業盡業盡故苦盡三道究竟唯在
如來是故中觀攝得界外惑也○三止觀攝一切智
者諸智離合如前所說三觀徃收無不畢盡世智不

照理十一智中已攝若廣明二十智者亦爲三觀所攝也。○四止觀攝一切行者前智是解解而無行終無所至行有兩種所謂慧行行行若三藏中慧行行行乃至圓中慧行行行慧行是正行行行是助行毗婆舍那能破煩惱復須奢摩他力助正知見正助兩行隨智而轉如足隨眼若三藏中無常析觀是慧行不淨慈心等是行行此兩行隨析智入空也若通中體法如幻化是慧行歷一切法數息念處緣事止觀是行行此兩行隨體法智入空也若爲化衆生修道種智緣俗理屬慧行緣俗事者屬行行此兩行隨道種智入假也若中道緣於實相一道清淨是慧行歷

一切法門諸度皆是摩訶衍十二因緣卽是佛性念處卽是坐道場等是行行此兩行隨中智入實相也復次根本四禪定慧等故兩攝欲界定少慧多觀攝中間亦爾四空定多慧少止攝四無量心前三心觀攝捨心止攝九想八念十想觀攝八背捨前三背捨觀攝後五止攝九次第定師子奮迅超越等是止攝四念處是慧性觀攝若作四意止說者作心記錄不淨等此屬止攝而終是觀爲主四正勤爲成念處一往觀攝若兩惡不生止攝兩善爲生觀攝四如意足從四因緣得定卽果爲名止攝五根信進慧三根觀攝念定止攝又信念兩屬五力亦如是七覺分擇法

喜進等觀攝除捨定止攝念通兩處八正正見正思惟觀攝正業正語正命屬戒卽止攝正念正定正精進止攝四諦三諦是有爲行屬觀門滅諦是無爲行屬止門十六行皆是觀門四弘誓依四諦起如彼十八不共法三業隨智慧行觀攝三無失止攝知三世觀攝餘可知四無畏者一切智無畏屬觀攝漏盡止攝至處道觀攝障道止攝三三昧門止攝三解脫門觀攝六度者前三是功德止攝後三是智慧觀攝又五度功德止攝般若觀攝又六度皆是功德莊嚴止攝乃至九種大禪百八三昧皆屬止攝十八空十喻五百陀羅尼皆觀攝如是等一切慧行行行無不爲

止觀所攝當知止觀名略攝義則廣○五攝一切位者若云一地卽二地二地卽三地寂滅真如有何客位此則無有次位又大乘經中處處皆說一切地位良以無生無滅正慧無所得能治煩惱業苦三道若淨於無爲法中而有差別次位何嫌若析法入空有無二門所斷三道如毗曇所明七賢七聖四沙門果成論所明二十七賢聖等差別位相乃至非有非無門位皆爲析空觀攝若體法四門入空所斷三道如大品明三乘共位乾慧乃至八地悉同入空止觀攝若從空入假修歷別行不得意者成三十心伏惑之位卽用空假兩觀攝若得意能破三道成十地位卽

第三觀攝或純用假觀攝乃至四門亦如是若圓信解行卽事而真從觀行入相似進破無明開示悟入佛之知見凡四十二位同乘寶乘直至道場涅槃說十五日月光用轉顯譬其智德十六日月光用漸滅譬其斷德亦如十四般若若是因位十五如妙覺是果位皆用中觀攝乃至四門亦如是問大乘不明地位止觀何所攝耶荅大乘經論皆明地位汝畏地位入無地位不免無縛文字性離卽是解脫雖說地位卽無地位中論云如外人破世間因果則無今世後世破出世因果則無三寶四諦四沙門果無何等三寶見旣不滅則無三藏中三寶四諦四沙門果尚不得

拙度道果何處有後三番三寶四諦四沙門果此斥
外道全無四番三寶等也若斥拙度者但有三藏中
三寶四諦四沙門果無後三番道果也如我所破者
卽有三寶四諦四沙門果何者析破界內煩惱業苦
卽有三藏三寶四諦四沙門果若體破者卽有三番
三寶四諦四沙門果點此一語治內之留滯破外以
閑邪去二邊之邪小正三寶四諦則立云何言無邪
但有位無位非證不了今但信教教有則階位宛然
教無則豁同空淨無句義是菩薩句義點空論位位
不可得不應生諍也又約中論偈四句亦得有地位
義偈云因緣所生法我說卽是空者卽破煩惱業苦

便有須陀洹若智若斷是菩薩無生法忍六地齊二
乘七地爲方便十地爲如佛此位自明云何言無偈
亦名爲假名者是漸次破界外三道卽有四十二賢
聖位云何言無偈亦名中道義卽是圓破五住便有
六卽之位云何言無祇用四句攝一切位一切位不
出四句四句不出止觀故言攝位也○六攝一切教
者毗婆沙云心能爲一切法作名字若無心則無一
切名字當知世出世名字悉從心起若觀心僻越順
無明流則有一切諸惡教起所謂僧佉衛世九十五
種邪見教生亦有諸善教起五行六甲陰陽八卦五
經子史世智無道名教皆從心起云何出世名教皆

從心起堅意實性論云有一大經卷如三千大千世界大記大千世界事如中如小四天下三界等大者皆記其事在一微塵中一塵既然一切塵亦爾一人出世以淨天眼見此大經卷而作是念云何大經在微塵內而不饒益一切衆生卽以方便破出此經以益於他如來無礙智慧經卷具在衆生身中顛倒覆之不信不見佛教衆生脩八聖道破一切虛妄見已智慧與如來等此約微塵附有爲喻又約空爲喻者發菩提心論云譬如有人見佛法滅以如來十二部經仰書虛空宛然具足一切衆生無有知者久之後更有一人遊行於空見經嗟咄云何衆生不知不

見卽便寫取示導衆生云何寫經謂令衆生修八正道破虛妄等修有多種若觀心因緣生滅無常修八正道者卽寫三藏之經若觀心因緣卽空修八聖道卽寫通教之經若觀心分別校計有無量種凡夫二乘所不能測法眼菩薩乃能見之是修無量八正道卽寫別教之經若觀心卽是佛性圓修八正道卽寫中道之經明一切法悉出心中心卽大乘心卽佛性自見已智慧與如來等又觀心卽假卽中者卽攝華嚴之經若觀心因緣生法生滅者卽攝三藏四阿舍教如乳之經若觀心卽空者卽攝共般若如酪之經若具觀心因緣生法卽空卽假卽中者卽攝方等生

蘇之經若但用卽空卽假卽中者卽攝大品熟蘇之
經若用卽中觀心者卽攝法華開佛知見大事正直
醍醐之經若用四句相卽觀心卽有涅槃同見佛性
醍醐之經又若觀因緣又觀因緣卽是佛性佛性卽
是如來是名乳中殺人若觀析空又觀析空卽是佛
性佛性卽是如來是名酪中殺人若觀卽空又觀卽
空卽是佛性是名生蘇殺人若觀假名又觀假名卽
是佛性是爲熟蘇殺人若觀卽中又觀卽中卽是佛
性是名醍醐殺人今通言殺人者卽二死已斷三道
清淨名爲殺人是爲止觀攝不定教略攝如上廣攝
者經一切經教悉用止觀攝之無不畢盡也復次心

攝諸教略有兩意一者一切衆生心中具足一切法門如來明審照其心法按彼心說無量教法從心而出二者如來往昔曾作漸頓觀心偏圓具足依此心觀爲衆生說教化弟子令學如來破塵出卷仰寫空經故有一切經教悉爲三止三觀所攝也○上六意攝法次第可解今直以一法攝一切法者一理攝一切理一切惑一切智一切行一切位一切教也又一惑攝一切理智行位教也又一智攝一切理惑行位教也又一行攝一切理惑智位教也又一位攝一切理惑智行教也又一教攝一切理惑智行位也△第五明偏圓者行人旣知止觀無法不收收法旣多須

識大小共不共意權實思議不思議意故簡偏圓就此爲五一明大小二明半滿三明偏圓四明漸頓五明權實夫至理不大不小乃至非權非實大小權實皆不可說若有因緣大小等皆可得說以小方便力爲五比丘說小以大方便力爲諸菩薩說大大小小雖俱方便須識所以故用五雙料簡使無混濫小者小乘也智慧力弱但堪修析法止觀析於色心如釋論解檀波羅蜜破外道鄰虛云此塵爲有爲無若有極微色則有十方分若無極微色則無十方分若析極微色不盡則成常見有見若析極微盡則成斷見無見此外道析色也析心亦如是若計有心無心皆墮

斷常此皆外道析色心也論文仍明三藏析法之觀
云色若麤若細總而觀之無常無我何以故麤細色
等從無明生無明不實故麤細皆假假故無常無性
卽得入空又介爾心起必藉根塵無有一法不從緣
生從緣生者悉皆無常或言一念心六十刹那或言
三百億刹那刹那不住念念無常無常無主煩惱本
壞無業無苦生死滅故名爲涅槃是名析色心觀意
也析名本於外道對破邪析而明正析何但外邪應
須正析若佛弟子執佛教門而生見著亦須正析所
謂三藏四門生四見著乃至圓教四門生四見著戲
論諍競自是非他若服甘露傷命早夭金鎖自繫流

轉生死宜須正析故大論云破涅槃者不破聖人所
得涅槃但爲學者未得涅槃執成戲論故言破涅槃
若爾皆用析法方便破之凡有四門於一一門具足
十法識正因緣乃至不起法愛能於諸門見第一義
故知三藏四門析法止觀斷真是小乘也次明大者
大乘也智慧深利修不生不滅體法止觀大人所行
故名大乘中論明卽空者申摩訶衍摩訶衍卽大也
衍中云欲得聲聞當學般若者元此是菩薩法大能
兼小傍挾聲聞譬如朱雀門天家所立正通王事不
妨羣小由之出入雖通小人終是天門今摩訶衍亦
如是正爲菩薩體法入空雖有小乘終名爲大例如

三藏析法雖有佛菩薩終是小乘所言大乘體法觀者異於三藏三藏名假而法實析實使空譬如破柱令空今大乘體意名實皆假自相是空本來虛寂譬如鏡柱本自非柱不待柱滅方空卽影是空不生不滅不同實柱又大論明摩訶衍人體法觀者引佛在一方木上告諸比丘譬如比丘得禪定時變土爲金變金爲土實非金土變化所爲色心亦如是非生非滅無明變耳本自不生今那得滅又引觀一端氎卽具十八空是名體法觀復次三藏所析名爲隨情觀色心析有之觀亦是事觀所入之真真非佛性不會實理但隨情爲真耳大乘體法名隨理觀色心如尋

幻得幻師尋幻師得幻法亦如尋夢得眠尋眠得心
尋幻色心得無明尋無明得佛性體法通理故名隨
理觀體法上觀凡有四門於二門皆具十法成觀此
觀非但體外道果報色心絀預一切執計三藏四門
乃至圓四門未得入者執門成見皆體如幻斷冥名
大乘止觀也若得今之用觀意大乘諸門生執尚須
空破終不同彼世間法師禪師稱老子道德莊氏逍
遙與佛法齊是義不然圓門生著尚爲三藏初門所
破猶不入小乘況復凡鄙見心螢日懸殊山毫相絕
自言道真慢瞿曇者寧不破耶○二明半滿半者明
九部法也滿者明十二部法也世傳涅槃常住始復

是滿餘者悉半菩提流支云三藏是半般若去皆滿
今明半滿之語直是扶成大小前已析體判大小今
亦以體析判半滿如前云○三明偏圓者偏名偏僻
圓名圓滿通途一往喚小爲偏于何不得別義分別
意則不可半小兩名尅定局短引不得長偏義亘通
從小之大譬如半月齊上下弦漸月不爾始自弓娥
終十四夜皆稱爲漸唯十五夜乃稱圓滿月小半亦
爾齊於析法半字小乘不得名大偏意則遠從初三
藏析法止觀已上別教止觀去邊入中已還皆名爲
偏故大經云自此之前我等皆名那見人也唯此圓
教止觀一心三諦隨自意語獨當圓稱也○四明漸

頓者漸名次第藉淺由深頓名頓足頓極此亦無別
意還扶成偏圓三教止觀悉皆是漸圓教止觀名之
爲頓此是按名解釋其義已顯今更廣料簡使無遺
滯若前二教止觀是漸而非頓力不及遠但契偏真
圓教止觀是頓而非漸行大直道卽邊而中別教止
觀亦漸亦頓何以故初心知中故名亦頓涉方便入
故名亦漸復次前兩觀觀教行證皆名爲漸別教教
觀行皆名爲漸證道是頓圓教教觀行證皆名爲頓
何故爾前二觀是方便說草菴曲徑故教觀四種俱
漸別觀帶方便說若依方便行先破通惑故三種皆
漸後破無明見於佛性故證道是頓也圓觀正直捨

方便但說無上道唯此一事實餘二則非真說最實
事是名教實行如來行入如來室衣座等復有一行
是如來行是名行實所見中道卽一究竟同於如來
所得法身無異無別是名證實前兩觀因中有教行
證人果上但有其教無行證人何以故因中之人夾
身入寂沈空盡滅不得成於果頭之佛直是方便之
說故有其教無行證人別教因中有教行證人若就
果者但有其教無行證人何以故若破無明登初地
時卽是圓家初住位非復別家初地位也初地尚爾
何況後地後果故知因人不到於果故云果頭無人
圓教因中教行證人悉從因以至果俱是真實故言

實有人也復次前三止觀教行證人未被會時尚不知圓何況入圓佛若會宗開漸顯頓悉皆通入雖非卽頓而是漸頓故法華云汝等所行是菩薩道各乘寶車適子本願決了聲聞法是諸經之王開通漸法悉令得入以別理接之故涅槃中得二乘道果不隔圓常因是修學皆當作佛卽是從漸入圓亦名開漸顯頓意也復次四種止觀入圓不必併待行成入圓不必併待開漸顯頓入圓則不定所以者何一切衆生心性正因譬之於乳聞了因法名爲置毒正因不斷如乳四微五味雖變四微恒在是故毒隨四微味味殺人衆生心性亦復如是正因不壞了因之毒

隨正奢促處處得發或理發或教發或行發或證發
如辟支佛利智善根熟出無佛世自然得悟理發亦
爾久植善根今生雖不聞圓教了因之毒任運自發
此是理發也若聞華嚴日照高山卽得悟者此是教
發也聞已思惟思惟卽悟是爲觀行發也若是六根
淨位進破無明是相似證發若更增道損生亦是證
發也此約圓家論入不定也若前三教行人各在凡
地發者卽是理發若聞於教是爲教發若修方便卽
是觀行發若於賢聖位中發卽是證發此約三家入
則不定也復有不定而非殺人如修無漏時有漏不
求自發全不殺二死若修中道發得無漏長別三界

苦輪海乃是一死而非二死亦名不定復次四種止
觀當分圓漸三藏中有從初心方便來入真位此名
爲漸三十四心斷結成果豈不名圓通別中初心乃
至後心豈無漸圓圓中當體理極稱圓亦有初心乃
至四十一地豈不是漸妙覺究竟豈不是圓圓圓非
漸圓圓漸非漸漸故知當分皆具二義也法華疏中
應廣說然漸漸非圓漸可得成圓漸漸圓非圓圓不
可得成圓圓何者法華云汝等所行是菩薩道故漸
漸成圓漸漸圓權設三教之果不可更成妙覺之佛
例小小非大小可得成大小小大非大大不可得成
大大權權非實權可得成實權權實非實實不可得

成實實何者三教果頭有教無人故權實不可成實
實半滿漸頓例應如此分別不復煩文也觀心往推
法相應爾而人多不信今用涅槃五譬釋成此意第
六云凡夫如乳須陀洹如酪斯陀舍如生蘇阿那舍
如熟蘇阿羅漢辟支佛佛如醍醐大論云聲聞經中
稱阿羅漢名爲佛地故三人同是醍醐此譬豈非釋
三藏中五味漸圓意類此得成三十二云衆生如雜
血乳須陀洹斯陀舍如淨乳阿那舍如酪阿羅漢如
生蘇辟支佛菩薩如熟蘇佛如醍醐此譬豈不釋通
教中五味支佛侵習小勝聲聞故與菩薩同爲熟蘇
佛正習盡名爲醍醐借此類通教當分漸圓義顯第

九云衆生如牛新生血乳未別聲聞如乳緣覺如酪
菩薩如生熟蘇佛如醍醐此譬豈不是別教五味意
十住初中能斷通見思盡名乳總擬聲聞十住後心
小深故擬支佛如酪十行十向如生熟蘇十地之初
已名爲佛故如醍醐借此顯成別觀當分漸圓意二
十七云雪山有草名爲忍辱牛若食者卽成醍醐草
喻正道若能修正道卽見佛性此譬豈不是圓意不
歷四味卽成醍醐借此類成漸圓等之位第八云置
毒乳中徧於五味皆能殺人此譬豈不譬於不定卽
成四種理教行證而得入圓今約漸頓作如此料簡
前三科後一科亦應如是但小大半滿齊分尅定不

得同耳○五明權實者權是權謀暫用還廢實是實錄究竟言歸立權略爲三意一爲實施權二開權顯實三廢權顯實如法華中蓮華三譬諸佛卽一大事出世元爲圓頓一實止觀而施三權止觀也權非本意意亦不在權外祇開三權止觀而顯圓頓一實止觀也爲實施權實今已立開權顯實權卽是實無權可論是故廢權顯實權廢實存暫用釋名其義爲乞問何意用此權實答佛知衆生種種性欲以四悉檀而成熟之若人欲聞正因緣爲說三藏欲聞因緣卽空爲說通觀欲聞歷劫修行爲說別觀欲聞卽中爲說圓觀是名隨世界悉檀亦名隨樂欲爲實施權說

權實止觀也爲生扶真之事善說三藏觀爲生扶真之理善爲說通觀爲生扶中之事善爲說別觀爲生扶中之理善爲說圓觀是名隨爲人悉檀亦名隨便宜而說權實止觀也爲破邪因緣無因緣說三藏觀爲破拙度故說通觀爲破共法故說別觀爲破帶方便故說圓觀是爲對治悉檀說權實止觀也爲思議鈍根拙度令人真諦說三藏觀爲思議利根巧度令入真諦故說通觀爲不思議鈍根拙度令人見中故說別觀爲不思議利根巧度令人見中故名爲一實而施三權權實相對則有四種止觀爲實施權意齊此也權實旣興良由悉檀權實可廢亦由

悉檀何者衆生煩惱結使厚利智善根薄故興初觀
生其事善事善若生煩惱伏薄卽廢三藏觀爲生理
善興於通觀理善已生卽廢通觀爲生界外事善卽
興別觀界外事善已生卽廢別觀爲生界外理善卽
興圓觀是爲興廢因緣故說於權實止觀也餘三悉
檀興廢可解若約五味教論興廢者華嚴爲大行人
廢兩權興一權一實三藏廢兩權一實但興一權方
等四種俱興般若廢一權興兩權一實法華廢三權
興一實涅槃還興四種皆入佛性無所可隔是故如
來巧用悉檀興廢適時順機而作皆益衆生是故如
來不空說法爲度人故應興應廢也對三權說一實

實存權廢已如前說今更料簡四種止觀皆實不虛所以者何若不開決則無入理今決了聲聞法是諸經之王開方便門示真實相一一止觀皆得入圓如快馬見鞭影卽得正路故四種皆實也又四種皆權何以故四理皆不可說權不可說故非權實不可說故非實非權而強說爲權非實而強說爲實等是強說何意不名權爲實耶以有說故故皆是權又此權實悉是非權非實何以故皆不可說故此非權非實不得異於向實向以見理爲實實祇是非權非實比義不異若異者應有別慧應照別理理惑旣同不可使異對權故說實廢教故說理故言非權非實卽教

而理權實卽非權非實無二無別不合不散非權非
實理性常寂名之爲止寂而常照亦權亦實名之爲
觀觀故稱智稱般若止故稱眼稱首楞嚴如是等名
不二不別不合不散卽不可思議之止觀也此非但
開實是非權非實開權亦是非權非實猶屬開權顯
實意耳問爲一實施三權唯有四種止觀若以別接
通止觀者爲權爲實復何意不預四數何意但言接
通何位被接接入何位答接得入教此則屬權接得
入證此則屬實也四教論其始終接但終而無始故
不入四數諸教皆接亦應有之此義不用者二教明
界內理二教明界外理兩處交際須安一接故但以

別接通若齊通爲言不論破無明八地名支佛地從此被接知有中道九地伏無明十地破無明卽名爲佛但一品破那得是極故知接入別也若望別教是入初地位行也若就諦論接者通教真諦空中合論從初已來但觀真中之空破見思惑盡到第八地方爲說真內之中故云智者見空及與不空被接方聞聞已見理卽是入別位也三藏菩薩明位不爾故不論接別圓發心已知中道更將何接故知接但在通也問三權皆得知實不荅別教初知通教後知三藏初後俱不知問若知何意名權若不知二經相違荅別雖初知帶方便聞教猶是權通雖後知可接者知

教終是權其意可見若言三藏不知違二經者大經云阿羅漢不知三寶常住不變者所有禁戒亦不具足不能得聲聞之道此義今當通任羅漢自力不能知見常住譬如天眼未開不見障外不聞他說亦不能知羅漢佛眼未開又不聞佛說那得自知常住故法華云於自所得功德生滅度想若遇餘佛便得決了又云聲聞緣覺不退菩薩亦不能知當知不聞則不知也經稱知者齊知已理真諦無爲亦是於常一相無變若人分別真諦二相遷動者不能發真要須觀空方入無漏如須菩提觀空僑陳如證無生智又律儀不具足者若能觀空得道共戒此是具足戒也

故華嚴云諸法實性相常住不變異二乘亦皆得而
不名爲佛故知常住語通得作此釋若不作此釋三
藏不說大乘常住聲聞那得具聲聞道具禁戒耶若
作此釋道共戒無失彌益其美又舉例釋者如大品
云煙欲障生梵天何況菩提爲生梵天須斷欲欲得
菩提斷二邊欲欲名雖同其意則異此義亦爾欲入
真諦須知無爲常不變易欲入實相亦知常住一相
不變知常語同大小則異故三藏止觀不知圓實不
違經勝鬘云若不知常住所有三歸皆不成就此云
何通遠尋根本三乘初業不愚於法若取四念處聞
慧爲初者此初知真諦常住不起六十二見以無倚

著心賢聖成就此釋同前意也若古昔爲初業者先
發菩提心早知常住畏怖生死退大取小法才王子
及涅槃中退轉菩薩從初已來歸依一體三寶薰修
戒善有受法無捨法心無盡故戒亦無盡一切戒善
爲此所薰譬如大地冥益樹木樹木萌芽悉得成就
小乘歸戒不離菩薩戒菩薩戒力能成就之卽此義
也若不作初業知常三藏歸戒渴磨悉不成就若作
此釋於大小兩經義無相違

摩訶止觀卷第三下